

光緒重修天津府志

重修天津府志卷四十六

傳八

列女一

歷朝

漢

雋不疑母不疑字曼倩渤海人也爲京兆尹京師吏民敬其威信每行縣錄囚徒還其母輒問不疑有所平反活幾何人卽不疑多有所平反母喜笑爲飲食語言異於他時或亡所出母怒爲之不食故不疑爲吏嚴而不殘

前漢書本傳

君子謂不疑母能

以仁教

續列女傳

鮑宣妻桓氏女也字少君宣嘗就少君父學父奇其清苦故以女妻之裝送資賄甚盛宣不悅謂妻曰少君生富驕習美飾而吾實貧賤不敢當禮妻曰大人以先生修德守約故使賤妾侍執巾櫛旣奉承君子唯命是從宣笑曰能如是是吾志也妻乃悉歸侍御服飾更著短布裳與宣共挽鹿車歸鄉里拜姑嫂禮畢提甕出汲修行婦道鄉邦稱之子永中興初爲魯郡太守永子昱從容問少君曰太夫人甯復識挽鹿車時不對曰先姑有言存不忘亡安不忘危吾焉敢忘乎

後漢書  
列女傳

晉

石崇渤海南皮人爲征虜將軍嘗置別館在河陽

之金谷有愛姬綠珠美而豔善吹笛

案舊唐書音樂志云綠珠

善舞以明君曲教之而自製新歌

孫秀使人求之崇不許秀怒乃

勸趙王倫誅崇矯詔收捕介士到門崇謂綠珠曰

我今爲爾得罪綠珠泣曰當効死於官前因自投

於樓下而死

晉書石苞傳

北魏

渤海封卓妻彭城劉氏女也成婚一夕卓官於京

師以事伏法劉氏在家忽然夢想知卓已死哀泣

不輟諸嫂諭之不止經旬凶問果至遂憤歎而死

時人比之秦嘉妻中書令高允念其義高而名不

著乃爲之詩

魏書列女傳人倫肇甄爰制夫婦統業承先難日

高允詩日兩儀正位

異族氣猶自然生則同室終契黃泉

封生令達

卓爲時彥內協黃中外兼三變誰能作配克應其

選實有華宗挺生淑媛

京野勢殊山川乖互乃

奉王命載馳在路公務既宏私議獲著因媒致幣

遵止一幕

率我初冠眷彼弱弄形由禮比情以

趣諸忻願難償影蹟易乖悠悠言邁戚戚長懷

時值險屯橫離塵網伏鎖就刑身分土壤千里雖

遐應如影響良嬪同感發於夢想

仰惟親命俯

尋嘉好誰謂會淺義深情到畢念守窮誓不二醮

何以驗之殞身是効

人之處世孰不厚生必存

於義所重則輕結忿鍾心甘就幽冥永捐室宇長

辭母兄

茫茫中野騶駟孤邱葛藟冥蒙荆棘四

周理苟不寐神必俱游

異哉貞婦曠世靡儔

異哉貞婦曠世靡儔

中書侍郎清河崔覽妻封氏渤海人散騎常侍愷女也有才識聰辨強記多所究知于時婦人莫能及李敷公孫文叔雖已尊貴近世故事有所不達皆就而諮請焉

漁陽太守陽尼妻高氏渤海人學識有文才高祖勅令入侍後宮幽后表啟悉其辭也

俱同上

刁遵妻司空高允女聰明婦人也長子楷舉秀才早卒遺孤冲高心憫之撫養尤篤冲免喪後便志學他方高雖涕泣愛憐竟聽其往卒成名儒祖母之教居多

方荃按刁冲傳整爲冲叔冲曾祖雍傳後又敘遵長子楷楷子冲則楷爲冲父

無疑前志及新通志誤以  
整為沖父今據魏書更正

唐

堅貞節婦李者滄州人

州志

年十七嫁為鄭廉妻

按舊

通志東光縣志皆作鄧廉誤州志從史作鄭廉

未踰年廉死常布衣蔬食

忽夢男子求為妻不許後數數夢之李自疑容貌

未衰醜所召也即截髮麻衣不薰飾垢面塵膚自

是不復夢刺史白大威欽其操號堅貞節婦表旌

門閭名所居曰節婦里

唐書列女傳

趙璘官滄州鹽院吏咸通六年璘犯罪應死將就

刑女請隨父死自訴七歲喪母父長育之辭旨甚

哀鹽使崔據義之遂具以聞詔嘉之且減璘死女

亦截耳侍父不嫁

前志引河  
開府志

宋

萬壽縣君徐氏靜海人天章閣待制施昌言妻也  
七歲喪母哀甚欲自投水火爲父兄抱持而止事  
繼母以孝聞歸施氏事姑謹縫紉烹飪必飭早暮  
寒暑飲食必時姑亡哀毀得疾踰年而後能起教  
五男一女不以愛故弛其勞遇宗族有禮待僕御  
有恩旣歿咸悲哀思之

前志引河  
開府志

賈玘滄州南皮人妻王氏子黃中澆化二年黃中



拜給事中參知政事太宗召見其母王氏命坐謂之曰教子如是真孟母矣作詩以賜之頒賜甚厚四年冬罷守本官明年知澶州辭日上謂侍臣曰朕嘗念其母有賢德七十餘年未覺老每與之語甚明敏黃中卒上聞其貧別賜錢三十萬既葬其母入謝又賜白金三百兩上謂之曰勿以諸孫爲念朕當不忘也

宋史賈黃中傳

因念翰林無良醫詔天下

大臣各薦能醫者其爲太宗追惜如此

王偁東都事略

滄州有婦人不食但日飲水數杯年近五十而容貌悅澤人問其故乃言自幼母病在牀家無兄弟

惟日賣果於市得贏錢數十以供母值歲歉米貴  
因仰天致禱今日所獲不足以贍二人願天憫我  
使我飲水不飢盡以所獲供母遂臨井飲水一杯  
以後遂不思食殆三十年

郭象暎車志  
參滄州志

李之儀妻胡氏淑修慶雲人尙書左丞胡宿女讀  
書善屬文嘉祐中從其祖母至內廷光獻皇后拊  
之曰是胡氏有學能文之女乎之儀母死淑修躬  
自負土封穴哭泣不輟手植松柏遂成茂林

明一  
統志

明

天津衛指揮倪旺妻楊氏年十九旺故守節無玷

六十八歲卒

前志引河  
間府志

指揮楊潤妻劉氏二十而寡子檜方一歲事姑以

孝教子有方年六十四卒

前志引  
衛志

指揮紀銳妻佟氏年二十二銳故守節素服終身

卒年五十二

副千戶張翔妻

河間府志  
作孫翔

王氏二十三而孀居無

舅姑伯叔教孤子以賢見稱

同上

千戶孫佑妻唐氏佑卒氏年三十悲痛不食月餘

而死

前志引河  
間府志

何昌妻王氏年二十昌故有求配者氏引刀破面

誓死不變年八十六卒

前志引  
舊通志

孫恕妻王氏年十八恕故無子事姑孝姑死殯葬

如禮年五十九卒

前志引河  
闡府志

謝芳妻倪氏年二十四芳故事姑撫子克盡慈孝

年七十五卒

前志引  
舊通志

馮綸妻朱氏年十九而寡撫幼子瀾成立瀾娶康

氏年二十三而瀾又卒婦姑凜節各八十餘歲而

終

天津右衛前所副千戶徐榮妻鍾氏年二十七歲

榮故子綱三歲家貧以耕織爲事守節無玷年八

十八歲

天津衛百戶馬馭貴妻佟氏年二十七歲貴故氏撫孤成立卒年六十歲有司給扁以旌

李天秩妻章氏秩故氏年二十七父母欲奪其志斷髮不從孝養舅姑姑死哀痛成疾而死俱同上

張和妻蔣氏年二十七和故撫孤食貧人服其節七十歲卒前志引衛志

天津衛左所總旗李實妻吳氏年三十五實故撫孤無玷七十五歲卒

孫能妻朱氏年二十七能故氏守服三年不出閨

門哀毀踰禮一日除服畢卽以是日閉門飲毒自盡衆皆哀之卒年三十歲

天津衛指揮使倪通繼妻李氏理家不私業成悉以歸前妻子雄祀先必齋戒待親族妾媵皆有恩都指揮僉事呂巖繼妻楊氏撫前子昂三歲如已出婚娶以時人以慈母稱之

生員李柏妻賈氏年二十四柏故氏撫孤無玷卒年六十五歲

天津左衛正千戶盧鴛鳴妻杜氏年二十六鴛鳴歿於王事氏撫四歲遺孤邦靖守志不渝撫按學

三院旌曰貞節可風年六十六歲終

俱同上

費宮人德容莊麗懷宗語周后命侍公主宮人聞賊氛昌熾數向近侍王承恩問之承恩曰若居深禁何問此且不他問而惟予數數也宮人曰惟居深禁故當預計惟公忠誠故相問耳承恩曰計將安出宮人曰設不幸惟有死要不可徒死耳承恩竊奇之有魏宮人者亦端麗年差長於費聞言曰卿計甚難吾則惟一死以申吾志耳及三月十九日李自成破都城周后及袁貴妃俱自縊帝召公主至曰爾何不幸生我家左袖揜面右手揮刀斫

其臂遂登萬歲山壽皇亭自縊承恩從死時尙衣  
監何新趨入宮見公主仆地宮人哭於側相與救  
之而蘇公主曰父皇賜我死何敢偷生宮人曰請  
以主服賜婢當誑賊以脫主乃令新負主匿國丈  
第闖賊射承天門將入宮魏宮人大呼曰賊入大  
內萬難保全有志者早爲計也奮身躍入御河須  
臾從死者三百餘人陸次雲費  
宮人傳略費宮人時年十六  
投晉井賊鉤出之見其姿容爭相奪費氏給曰我  
長公主也若不得無禮必告汝主羣賊擁之見自  
成自成命內官審之非是賞部校羅賊羅攜出費



氏復紿曰我實天潢之肩義難苟合惟將軍擇吉成禮死生惟命賊喜置酒甚歡費氏懷利刃俟賊

醉斷其喉立死因自刎自成大驚令收葬之

明史紀事

本末 蔡敬盛案此外記費宮人者殺寇紀畧西河襟菱虞初續志烈皇小識與陸次雲袁枚陳大復張大年諸詩文均未言何許人至乾嘉間樊彬梅成棟馬壽齡諸人始指費家衎衎爲其故里先曾有祠並有遺像如謂諸子傳會桑梓則趙泌高澐墳高繼珩亦有詩張之愚意鼎革之際津地人文未盛先無紀載不足爲異卽前志草創如殷少保墓尙見遺何有於此亦不可據以疑之且觀郡內自興濟張氏之外稱某秀文莊者不一蓋因地近人傑明代固多選入掖庭費氏度爲津人歟

青縣

岷府長史馬政女吉占妻馬氏正德七年兵變賊

欲汚之氏罵不絕口遂遇害詔旌其門

前志引河  
閒府志

生員裴恭妻蕭氏早卒無嗣氏年二十四侍養舅  
姑清節凜然以壽終

生員姚淡妻李氏年十八淡故貞節苦志奉旨旌  
表

生員苑琇

按苑琇縣志作范秀觀下范甯爲秀之  
子則是范非苑可知但琇之爲秀必有

一誤妻張氏年二十六琇故撫孤成立孝事翁姑苦  
節三十餘年宏治中有司奏旌其門

俱同上

范秀子甯妻程氏

按同治五年補鑄縣志  
程氏作楊氏當有一誤

甯卒氏

年十九無子事姑張氏盡孝節操聞於遐邇

前志  
引縣

志

張珍女年十八尙未適人遭流賊突至被獲欲污之不從賊持刀脅之女曰甯使吾身血賊劍不使賊子污吾身罵益厲賊遂殺之詔旌其門曰烈女

前志引河

閩府志

生員姚同文妻蕭氏年二十三守節孝事公姑撫

養二子列名庠序御史左光斗題旌之

縣志

姚光表妻黃氏年二十四守節子命禹甫七歲氏教訓入學出仕侍奉舅姑四十餘年崇禎間旌獎

節孝

前志引河  
閩府志

孫瓚按瓚縣志作贊妻朱氏年十六守節七十三歲終以

苦節被旌

生員王可迪妻姚氏年二十三可迪故子甫週歲

氏養親教子備嘗艱苦享年八十有司旌之俱同上

馬冲斗女年十六未字崇禎己卯賊陷青強逼不

從鞭挺交加遂遇害舊通志

靜海縣

李橘妻徐氏橘故氏年十九無所出紡績度日苦

節六十年有司旌之縣志

胡繼芳妻李氏夫故年二十二諸子俱在襁褓家

甚貧孝親撫子享年八十有二督學疏請旌表

前志

引河間

府志

閻浩妻李氏浩卒氏二十歲舅姑欲奪其志不從  
氏內盡女工外課農桑訓子孫悉有成立守貞踰

五十年享壽八十餘

同上

宮論妻郭氏

按靜海縣志作  
郭論妻宮氏

論卒氏年二十五家

貧子幼舅姑老適氏孝親訓子後子繼孝舉於鄉

前

志

馬邦屏妻于氏年二十夫亡姑老子幼慈孝著聞

郡邑旌之

前志引河  
間府志

生員李果妻劉氏年二十一歲孀居家貧事舅姑

生死盡禮教子邦奇補邑增生苦節閱五十年上

同

于道一妻劉氏夫卒年二十二撫二子成立有司

旌其門

前志

生員張問仁妻胡氏問仁早卒氏貧甚教子延祚

補邑庠生年五十八

劉一本妻楊氏夫死紡績事舅姑訓子之奇食餼

有司旌之

趙思恭妻劉氏少寡訓兩子成立糟糠無悔年六

十五卒

鄭雲蛟妻劉氏雲蛟死氏年二十五歲無子孀居

年七十有六

俱同上

樊德華

舊通志前志縣志皆作得華

妻楊氏正德閒流賊陷靜

海被擄楊怒罵賊以金帛誘之終不屈遂被殺尸

僵立不仆

大清一統志

賊懼羅拜去邑人往視之手猶

作指罵狀血忽湧出頭面如生有司旌之

前志引縣志

王德風妻于氏夫死託舅姑於兄嫂號哭不食七

日而死有司旌其門弔以詩文者頗多至今傳誦

前志引

舊通志

齊公魯繼妻徐氏公魯元配卒於官誓不再娶父

母憐之迎徐送之任所成禮公魯重遲親命又懷  
前盟悵怏而死徐扶櫬歸里守節終焉壽八十迄  
今傳之曰徐老姐謂其終身處子也

前志

孫灝爲嘉興令有二女長性狹不諳人事次豐美  
穎慧問字者多舍長而及之女曰姊配乃配不然  
終身不嫁也竟同姊老於閨奉姊朝夕惟謹享年  
七十並葬於北郭外至今墓存焉

陳恕妻楊氏男友文妻尙氏孫魁妻官氏三代少  
寡貞節競標

俱同上

巡按御史方觀察王李任三位

皆旌表其門

前志引河  
間府志



于嶺妻李氏青年而寡守一子子死弟欲嫁之誓死不二以澣衣易食沒齒不見色笑年七十終

高萬億妻邢氏年十七歸高生子如斗娶婦蕭氏如斗死蕭時二十二歲守節養親育兩孤於襁褓未幾以哀瘁吐血死邢氏撫育兩孫俱教之成名年八十五歲後以曾孫爾儼貴俱贈一品夫人俱同

上

陳尙賓妻胡氏因家難隨夫奉母往依徐州逆旅中孝敬備至及賓卒胡年三十訓子有成孀居五

十年闔學公舉旌獎

縣志

蕭汝重

縣志作  
董汝重

妻張氏適蕭三載夫故尊章年老

子幼家貧親操機杼以供甘旨姑寢疾臥起扶掖

不少怠撫前二子如己出篝鋸蓄館以課其工操

履堅貞八十餘卒

前志引河  
閒府志

滄州

忠義衛鎮撫李壽妻趙氏宣德七年壽歿氏年四

十無子乃捐身從葬詔旌宜人

前志引河  
閒府志

何昇妻李氏宣德初昇卒氏年二十二子睦甫三

歲植孤守節成化閒旌表

前志

邢表女正德閒流賊至城閉女隨父夜奔會家莊

獲女劫以威女痛罵不從賊怒殺之

同上

閔祐妻米氏正德六年流賊至獲氏逼汚氏罵賊

自毀其面遂被支解

前志引河  
間府志

王建中妻楊氏氏二十而孀甘貧守節日不聊生

以針黹爲活卒年七十

同上

廩生朱守正妻李氏年二十二歲夫亡家貧撫子

燦暨孫富夏育夏俱爲庠生

前志

李應科妻孫氏三十而寡族人同謀嫁之刺血誓

神不爲動苦節四十餘年撫己子與庶之子俱成

立居有雀蛇之祥人以爲瑞應

前志引  
舊志

生員王楓妻路氏楓亡年二十柏舟自誓撫子煥

孫肇稷俱爲庠生

前志

宋魯妻馮氏魯故子守志甫生六月撫之成立三十  
十年貞節不變

馮士舉妻馬氏年二十七而寡家貧紡績自給撫

孤成立卒年七十六有司匾曰柏舟矢志

俱同上

于宗建妻李氏夫故守遺腹子成立孀居四十餘

年清操不改

前志引河  
間府志

崔波妻劉氏年二十二而寡子女俱無苦節六十

餘年以壽終

同上

生員姚讓妻馬氏讓故年二十撫孤僅一齡勤紡績教子延慶成立事姑至孝萬曆十一年奉詔建

坊旌表

前志

劉謨妻張氏年十八夫亡家貧姑老子幼浣漿度

日誓無二心以節孝終按院題旌

前志引  
舊通志

米炫妻許氏夫亡遺兩孤俱幼矢志守節撫之成

立年七十餘卒旌表

同上

盧守義妻鄧氏年二十二守義患心疾自縊悲號

甚切至半夜亦縊死

前志引河  
間府志

郭應鶚妻厲氏年十七得遺腹子堅志撫養有司

旌之

陳哀素妻劉氏夫死年甫十六立志守節撫幼子  
事舅姑極稱慈孝

贈河南右布政王三宅妻史氏年十九而寡子公  
弼始週歲矢志撫孤成萬曆丙辰進士奉旨建坊  
旌表累封太夫人年八十三歲終

俱同上

生員李庚之妻王氏崇禎十一年土賊肆掠時十  
九歲避難楊家村賊入欲劫之大罵被殺賊去父  
母欲易棺改葬及開視異香襲人顏面如生

前志

廩生劉壁妻張氏壁故子欽甫六月氏二十二歲

堅志不移孀居五十餘年

前志引河  
間府志

陝西參議道齊之宸妻劉氏崇禎十六年流寇破  
西安同子士昂妻謝氏姪孫景堯妻李氏俱縊死

州志

生員于化成妻王氏年二十四歲堅志守節巡撫  
馮元颺扁曰貞節

有成妻王氏二十一歲而寡立志守貞年臻上壽

巡撫馮元颺扁旌曰節壽雙高

俱同上

孟村女崇禎末盜掠滄州至孟村見女有色併其  
父母繫之女不受污則縛其父母炮烙呼號慘切

命女從賊女請縱父母去乃從賊知其紿已必使  
先從而後釋女遂奮擲批賊頰與父母俱死棄尸  
於野後賊與官兵格鬪馬至屍側避不前遂陷淖  
就擒女亦靈矣惜其名氏無可考

紀昀灤陽  
銷夏錄

### 南皮縣

劉鏜妻萬氏青年守節遵舅遺命讓產於夫弟無  
難色事庶姑以禮教子嚴而有體布衣蔬食淑德  
著聞年八十餘歲子深成進士

前志

李資女許聘巨惠時正德六年寇亂女爲所獲罵  
不絕口賊怒刃之死極慘時有郝氏女壘城村人



遇害與李同

前志引河  
闡府志

吳茂才妻高氏茂才年二十九而娶高年甫十七  
執婦道惟謹吳遭痞疾不可藥婦進餽粥除糞溺  
年餘無怠意吳自知不起執婦手曰吾死命也願  
子早得佳偶以答子勞婦曰如君言是外視妾也  
將隨君逝特先後聞耳無何茂才卒殮葬畢婦哀  
毀不食者累日父母百端溫諭且欲移其志陰受  
他聘卜日將嫁矣婦知之謾應曰如命請得絮酒  
隻雞致辭於亡者舅曰貧無以備請楮錢辦香日  
亦無婦恐疑而阻之遂往墓側哭盡哀少時人散

乃脫足纏就墳樹縊死跪而向墓面色如生事聞

旌表

前志引  
舊通志

庠生尹某妻郝氏應聘之仲子婦也崇禎十一年  
遇亂兵被執馬上北旋其夫奮勇力追遇害氏仰  
天長號立投馬下而殞

武生崔文俊妻黃氏年十六夫故遺孤僅一周苦  
節二十餘年崇禎甲申城破被執不屈死俱同上

庠生白德崇妻穆氏崇禎甲申爲亂兵所執不屈

投井死

前志引河  
間府志

庠生劉名卿妻馬氏甲申城破被執不屈受刃死

崔岳妻黃氏崇禎甲申城破被執不屈受刃死俱  
上

劉奇妻鄭氏夫故守節撫未週歲子文義家貧紡  
績自給年八十餘文義死遺子賡文義繼妻楊氏  
半載卽寡撫賡如自出奉鄭惟謹賡入庠有司旌

其閭曰一門雙節

前志引  
舊通志

湯楷妻劉氏年二十一歲夫亡無子女哀號欲殉  
至於失血絕粒旬日姑憐而苦勸之乃稍進食有  
議奪志者截髮自誓更欲求死堅貞不可奪苦節

四十餘年巡按疏聞詔旌其門

前志

張文秀妻王氏秀死王年未二十撫二子家貧甚  
夫弟強其志終不可奪值歲祲斷炊三日鄰人憐  
而食之舅姑歿無以為葬鬻一子以襄事苦節五  
十餘年

劉呈芳妻趙氏年二十二夫亡無子女家貧日不  
再食紡績奉舅姑誓不改節舅亡與姑相依夫弟  
將嫁之氏礪刃欲刎值夜雨壞舍獨立水中達旦  
不假鄰棲姑亡氏亦死苦節二十餘年

俱同上

邑庠生劉瀾妻馬氏年二十二夫亡矢節教子讀

書孫曾世其業年九十餘歲

前志引河  
間府志

晉光美妻葉氏十五適晉家頗富遭變中落夫死  
子幼餬口無資困頓不堪父母勸令改醮不從以

苦節卒

舊通志

黃塗妻周氏年二十一夫亡子良相甫一週家貧  
紡績事舅姑以孝聞教子有成年八十三歲

前志

鹽山縣

韓思貴妻邊氏貴死年二十五誓不再適又思貴  
兄思遠卒妻劉氏年二十六俱守節不二孝事舅  
姑洪武閒旌之

前志引河  
間府志

李茂德配張氏諸弟仁義配孫氏興祖配張氏希

賢配陳氏昆弟皆早世姊姒俱誓無二志茂德子  
勉學六歲孤興祖子志學八歲孤希賢子敏學在  
腹而孤仁義無子甘貧紡績同居終身子相繼成  
立人謂之一門四節

前志

崔祥妻劉氏祥死氏年十八父母欲嫁之不可奪  
遺腹生一子撫養成人守節六十五年成化中旌

表

同上

王憲妻李氏嬪六月而憲卒時李年十九有遺腹  
舅姑欲嫁之不從及彌月生子李撫養之終不二

心

前志引河  
間府志

宋甫林妻馮氏年二十一甫林亡子未週歲誓不改適躬織紉操井臼事舅姑撫幼子孀居四十一年卒

同上

生員劉繼芳妻霍氏知縣淵之女氏年二十繼芳死無子苦守孀節年八十三卒

前志

劉架妻李氏年十七架死無子舅姑欲嫁之不從苦守孀節年七十七以疾終嘉靖中旌表

生員高渭妻朱氏年二十五渭故無子守義不變甘貧以養孀姑立姪以繼夫嗣壽幾七十人無閒

言俱同上

生員張永錫妻朱氏夫故時年二十三遺子沂汝

俱幼守志教子始終不移士論賢之

前志引河  
閔府志

高大體妻張氏夫故時年二十三遺一子尙在襁  
褓孀居四十餘年遺子不肖蕩家幾盡而冰操愈  
勵

王守成妻劉氏夫死時年二十四守節撫孤四十  
餘年有司旌獎

貢生張繼世妻邢氏夫故時年二十九守節不渝  
課子格力學勤績紡以佐之後補廩生

俱同上

韓得禮妻高氏夫故時年二十五家貧無子甘心



直隸天津府志卷之二十一 列女  
守志撫夫弟成立妯娌同居雍雍無閒壽至八十

萬厯閒建坊旌表

前志

宋友妻許氏夫故時年二十六勤慎織紡教子成

立

前志引河閒府志

生員李遷桂妻邢氏遷桂歿子繼元二歲撫育成  
人娶妻王氏繼元復死遺一子姑婦堅心苦守織  
紡自給

生員劉自持妻張氏年二十四自持亡遺腹子三  
益撫養備至織紝佐讀補邑廩生守節四十餘年  
卒

劉喬齡妻霍氏夫故時年二十四子金鉦未彌月  
苦心堅守不以險夷二志歷四十餘年如一日

生員張鶴妻王氏年二十六夫故子利蒙在襁褓  
堅貞自持撫育教訓補邑庠生子伶仃無依艱

辛備歷孀居五十餘年

俱同上

王忠肅公勦妾侯氏公爲都憲時張夫人置侯作  
妾逾歲方以告公公不納贈以金帛遣之返侯不  
復嫁公卒斬衰哭臨公男竑感其志留養如庶母  
禮竟以處女終身旣卒祔公塋側

前志

進士王文棟妻劉氏崇禎己卯攜一女避寇被獲

晉作天澤月志  
脅之不從母女同死

前志引  
舊通志

生員邵汝德妻霍氏霍堂孫女崇禎己卯兵變被

掠懼辱自縊死遺子沖方六齡後成名

前志

劉匯妻孫氏崇禎己卯兵變逼令乘馬氏投地不

屈被殺

同上

楊宏妻趙氏宏卒五月生遺腹子時年二十二歲

事姑撫孤三十三年子復亡教育遺孫俾得入泮

卒年七十三

前志引河  
開府志

崔居州妾李氏年十八適崔八閱月而居州卒子

女俱無矢志守節以壽終

前志

生員賈從新妻霍氏

縣志作翟氏

歸從新僅三載夫卒

子女俱無矢志守節親族罕見其面四十餘年如一日有司旌其門

賈天恭妻劉氏年十七適恭逾年恭死劉誓不再適壽至七十餘邑令旌其門曰節凜秋霜

廩生劉恆性妻張氏年二十九而寡撫兩子曰讓曰慎讓早亡子爲砥生甫四月慎復亡兩媳並甘守節事姑盡孝撫孤爲砥入泮一門三節邑令旌之

李守用妻于氏于歸後粉黛不施不輕言笑夫歿

撫兩子騰蛟騰龍成立氏擅勇力在室時有賊僧等八人率眾闖入其村氏戴瓊笠登屋投磚石擊斃數賊賊避其鋒散去及氏七十餘值咸都督繼光東征過境兵借寓橫暴氏毆傷數人賊聞知笑而嘉獎之歎爲異人年八十餘猶健飯勝人萬歷二十九年含笑而逝

于廷陳妻朱氏夫任山西猗氏知縣崇禎癸未冬殉闖賊之難朱扶柩歸里攜側室趙氏葬夫教子勤儉睦嫻與趙氏苦節同堅恪守禮法鄉里稱之

俱同上 按朱氏從縣

志列於明季不從前志

慶雲縣

劉泰妻張氏泰歿張年十九誓死守節織紡自給

撫孤子成人知縣宋漢以聞表曰貞節

前志

生員杜時雍妻翟氏正德六年流賊楊虎破城翟

抱子罵賊不輟聲賊殺之時年二十二

前志引河間府志

陳宗禮女妙存年十七正德六年流賊破城女遭

擄罵賊不從賊怒以刀刺之遂死知縣蔡維藩以

聞表曰貞烈

前志

生員田襲妻趙氏襲死趙年二十孤四歲孝事舅

姑守節不渝

同上

生員胡敏學妻張氏敏學死張守貞不二有司旌

之前志引河

閒府志

谷全妻鄭氏流賊破城被執罵不絕口賊怒碎屍

而死

前志

庠生馬斯臧妻姜氏于歸三月斯臧得疾姜侍湯藥備極艱辛斯臧竟不起姜一慟幾絕至葬扶輦大號以身據棺躍入坎中其姑扶掖以歸自是不復櫛沐飲食俱忘值清明墓祭姜請於姑許之令斯臧妹偕往姜至墓給其妹曰燎紙用薪可往採之妹行姜遂縊於墓樹時嘉靖三十二年二月也

美年十六知縣羅汝賢具牲醴弔於墓學使疏其事勅下禮部移文郡縣給銀立坊旌曰貞節

寶九曜妻秦氏夫被讐誣捕役執秦欲亂之抵死不從自持刀刺心而死

尹世福女方笄有姿色已卯兵變欲亂不從投磚石拒之罵不絕口兵怒推入室中縱火燒死

王顯祿妻劉氏年二十遇賊將辱之不從罵賊被

殺邑人義之

俱同上

石漁妻劉氏夫死年二十四無一子一女備茹辛

苦卒年六十餘

前志引舊通志



生員陳俞妻賈氏年二十五遭兵變是日值舅亡  
家人挽之出痛哭曰舅屍未殮予何惜一死身服  
斬哀守之不去兵至迫之罵不絕口鋒刃交加幾  
無完膚火焚而死

前志

楊某妻劉氏年二十二夫死守節紡績以給劓子  
朝用補諸生知縣杜爵旌曰貞節

趙西妻朱氏西死朱年二十三守節不渝撫孤貧  
補廩生知縣杜爵旌曰貞節

王自復妻劉氏年十九遭寇變扶掖上馬屢次觸  
地賊怒殺之

俱同上

生員張希曾妻唐氏年十九而寡躬自紡績屢經

歉歲攜孤流移年六十餘克全貞節

前志引  
舊通志

李揚妻胡氏揚死僅二十歲華年守志迄於蓋棺

冰雪爲心邑令旌之

前志

生員崔元吉妻李氏元吉亡李年二十四飲冰茹

檠矢志靡他五十餘歲卒

前志引河  
開府志

吳廷順妾蔡氏年二十順亡越月生遺腹一女伯

氏欲嫁之蔡以產業悉給諸伯獨撫孤女紡績自

給年六十八病卻醫藥而卒

同上

廩生胡時禎妻劉氏時禎亡時年二十一歲矢志

冰雪卒年七十知縣陳某旌其門

前志

廩生胡時化妻劉氏時化亡矢志守節七十而終

知縣陳某旌之

同上

胡時茂妻劉氏夫亡年少舅姑欲嫁之以養親自

矢繼子爲嗣孝慈兼盡卒年七十

前志引河間府志

生員賈成吾妻于氏夫亡時年十九子書方五歲

苦志冰操訓之成立知縣陳某旌其門曰冰清玉

潔

前志

李伸妻秦氏伸亡時年二十四子女俱無紡績度

日矢志苦節終身不渝知縣陳某旌其門

陳謨妻王氏謨死時年二十二歲撫子孝姑守節  
終身知縣陳某表其門曰貞節

胡宇清妻張氏夫亡時年十八食貧矢志人稱貞  
節卒年六十四

胡瑤妻張氏夫亡時年二十孝親撫孤子苦節終  
身

生員郭士秀妻張氏年二十歲秀卒苦節終身

胡士奇妻鄭氏士奇死時年二十三子女俱無家  
無升斗紡績度日苦節終身年七十歲

胡宇陶妻李氏夫亡時年二十二子幼姑老事上

撫下人稱節孝

王進祿妻李氏

宗元妻某氏

俱同上

重修天津府志卷四十七

傳九

列女二

國朝

天津縣

處士李友泰女名芝圃字卓菴幼穎悟通孝經列女傳母徐名巒字煙玉精繪事女得其傳尤工寫大士像性至孝不忍違親矢志終身不字女紅所入佐甘脆焉母病侍藥餌目不承睫籲天減算以益母壽迨歿痛不欲生父患疽女口舐所患者四旬疾賴以除五十四歲卒彌留時以二親未葬囑

弟讓殮以白衣君子嘉其知禮前

列女

志

候選訓導王華清女字桂馨嘗割臂療祖母黃氏  
病愈後創痕時發歸文童趙慶雲踰年創痕復發

死縣

志

孝女某姓氏不傳父工繪事母氏朱性好佛夢大  
士持金環贈之已而娠生女因名爲佛女幼穎慧  
工吟咏及笄以父母無子矢不字事之盡孝雙親

歿賣繡自給守貞終身

梅成棟佛女記佛女者津  
邑望族以詩書世其家父

善畫筆墨爲生母氏朱好善茹素妊女時夢大士  
持金環一授諸懷曰寶之此孤環也世無其偶已  
而生女幼明慧甫三齡日已識數百字長而玉貌  
花顏秀骨珊瑚望類仙人皎然若冰雪兩親珍愛

之性嗜潔誓不嫁親強之女曰非敢梗親命也女  
之嫁猶男子之仕也士不盡仕女豈盡嫁乎親不  
見仕者乎熱中屈己奴顏婢膝所甘未償所苦兒  
有異性不樂與俗人居且親老矣兒無兄弟適人  
後堂上益寂寞無歡儻誤適匪人且重爲兩親憂  
盍留兒續佛相伴娛二老餘年乎親不忍違其意  
姑聽之里人問名者庸至胥擯勿許喜讀書父積  
書多卷女靡不拔覽久而能文最工詩治父母晨  
夕二炊外輒閉戶謳吟拈題選韻評論古今積成  
卷軸祕自緘藏不肯炫示嘗有句云新詩草就無  
人贈聞向梅花窗下吟其風旨可想已而兩親先  
後病歿子女銜酸茹泣哀踊盡禮里人觀者唏噓泣  
下歎有子者勿如也終喪後擗棺旣罄難以存活  
遂賣繡自給親舊罕覩其面家留一乳媪持所繡  
出鬻人爭購之恐不能得所刺花鳥如生聞刺所  
自爲詩句視所資足數日餐惟繡經坐焚香垂  
簾而已棟重女之名浼媪以詩囊求刺兼勾詩句  
女曰梅孝廉老於詩龕久矣勿留其值我爲繡之  
得絕句二喜過望一日徐謂媪曰我去矣家什盡  
取所著詩卷熟火焚之徐謂媪曰我去矣家什盡



以付汝幸瘞我兩親秀語  
畢端坐逝闔室聞柝檀氣

吳某妻韓氏其父文義官千總卒於清江浦閱七  
年始聞耗氏謀歸櫬吳難之氏泣曰人孰無父櫬  
不返生女何爲乃鬻器具攜僕媪抵清江遍訪無  
知者具牒請於官始知父歿海州距清江七百餘  
里路險絕韓卽日起行至其地經一村舍驢忽止  
策之不行韓心動入詢之卽父舊所主也言當日  
情狀甚悉且指藁葬處韓悲痛欲絕啟塚拾骨裹  
而歸或告爾父曾寄金某某訟之可得韓曰吾豈  
爲訟金來哉囊骨徑返負之輕如葉

周焯撰韓  
孝女傳

監生康起鵬妻張氏割股療父疾愈

縣志

內閣中書王文蔚妻張氏割股療父疾愈

文童李聯第妻年十九子歸未兩月夫故矢志貞  
守孝事翁姑撫繼嗣如己出道光十八年四月父  
德潤猝患暴症聞而馳往甫入門父已卒矣一慟  
遂絕時年三十四里黨咸以節孝稱之

景州營守備梅雲彪妻王氏母汪氏病割股和藥

以進愈

俱同上

梅香垞妻婁氏名瑛幼割股醫父疾卒年四十三

新通

志

文童張際亨女老姑少孤胞兄單丁早亡事寡母  
矢志不嫁母楊氏卒女年四十五旌時年五十七

請旌  
冊

張靖女名筠字竹芳少耽文墨工詩及笄歸繆其  
位父無子氏隨侍之浙江浦江任父卒從者雨散  
氏隻身扶柩返葬經錢塘江中大風雪幾遭覆溺  
繪長江風雨圖名流題詠殆遍

李向榮女大姑年十三親老無子家寒素父母將  
議婚女再三泣阻曰女嫁則侍奉無人願操針黹  
以供朝夕允之迨父母俱歿三十餘歲矣葬親後

就養外家親屬欲嫁之女以木主無依立志不嫁  
仍以針帶自供旌時守貞已四十一年

沈季生女煥姑家城內任家巷光緒七年三月初  
五夜四更候遭火季生遠遊室中一妻並子女六  
人煥姑時年十二火及簷急起開戶先促其母徐  
氏並其弟出隨將在襁褓中之一弟一妹攜付母  
懷催母速走急復闖入救其九齡六齡兩弟喊止  
弗聞在黑煙中傳語兩弟不出已亦不出也語未  
既而火倍熾救者束手次日掘得煥姑屍身覆兩  
弟握手不開觀者慘然下淚

梁允元女大姑生而穎悟針黹外兼喜讀書明大義無疾言遠色一以靜默自持兄謀食遠方賴女能養親父母每爲擇配輒泣下力阻之未幾父病女親侍湯藥衣不解帶者數月父歿後哀毀異常由是奉母益篤跣步弗忍離母衰老飲食坐卧胥賴女一身扶持至母歿女心力交盡旁觀隕涕時女已三十有一兄亟爲議婚急止之曰雙親抔土未乾何忍行吉且年已過時何嫁爲日惟焚香誦經足不踰閭旌時已二十餘年

俱同上  
以上孝女

處士陳德楷季女雍正乙卯副榜雲南大理知府

邵滋子聘賢未婚妻聘賢亡女奔其喪遂矢志守貞未嘗一至母家戚族亦罕見其面事姑盡孝七十四歲卒

縣志

于單某聘室王氏單亡女奔其喪遂守貞焉邑人周焯爲作貞女詞

張有名聘室邢氏張亡女守貞以終身乾隆五十八年旌

劉德聘室張氏年二十餘未嫁而德卒於外矢志守貞五十四歲卒乾隆五十九年旌

宋文鳳聘室丁氏年二十二未歸而文鳳亡女誓

不改字奔喪宋室守貞焉道光十一年旌

尹宏明女許字桂松年爲室松年家燬於火出亡  
不知所之父母欲爲議婚女堅拒不從居母家守  
貞至七十六歲卒鄉人士請附葬於九烈墓側道  
光十九年旌

夏長齡聘室貞女陳氏道光二十四年旌

孟鳳舞聘室裘氏年二十四未歸而鳳舞亡於外  
女聞訃誓死不貳鳳舞兄舉人鳳來聞其志堅迎  
以歸及鳳來卒女與鳳來妻崔氏甘貧苦守六十

七歲同治九年旌

俱同上

趙第元聘妻周氏年二十第元卒女聞訃欲往弔  
母未許晝夜哭泣自絕飲食父母從其志始歸夫  
家奉侍祖姑及舅姑克盡孝心鄉里稱之旌時年

三十四

請旌冊

鹹水沽文童古江聘妻王氏年十四江卒女聞訃  
奔喪過門守貞侍舅姑克盡孝道年二十卒

同上

賈氏幼字李某某聞其貌陋求退婚父兄欲許之  
女不允每聞父兄改字之議輒操刃欲自戕曰吾  
誓爲處子老矣六十八歲卒

縣志

張士孟聘室裘氏通文字每讀書史見古貞烈輒



感歎焉年二十三未歸而士孟卒母欲改字女不可時母姊有子欲聘女乃私約於其母強娶女去女號哭聲聞動閭巷居人曰女不嫁義也糾眾奪還女已慟絕久之乃蘇以聞於官官聞義之判歸

張守貞至四十二歲卒

同上

趙玉琴未婚妻武清高希端女也年十二歸趙爲養媳孝事舅姑未幾玉琴外出不歸舅覓子亦無音耗女年十六姑勸令他適女不可佐姑紡績度日後聞舅婿皆死父微示意女志不移貞守終身

邑紳趙靜軒爲請旌表

楊慎恭高貞女傳節錄值歲大饑糧屢絕請葛子宿

義而俠聞而欽之慨然曰貞女孝婦且遇慈姑而  
聽其窮困以死非吾輩之恥乎遂與其弟古香十  
洲倡率捐資得數百緡代權子母每月以息錢造  
門置閨內不與女相見也又五年女年四十一歲  
室傾於雨依敗壁爲巢古香等爲築草屋三閒居  
之又數年姑病卧女嘗藥調羹祈天借壽須臾不  
離左右者三年餘姑握女手以終古香曰此後不  
可造貞女之門以錢倩戚媪付女而女盡以營殮  
焉

葬

劉大聘室王氏未嫁而劉卒女時年十四父母欲  
奪其志不可家貧以針黹自活及父母歿依孀妹

以居苦節四十餘年

縣志

吳彬聘室史氏未婚而彬亡女矢志不貳父母歿  
隨兄存活兄操微業不能兼贍女以針黹自給苦

守數十年道光十七年卒葬九烈墓側

史樂善撰傳

雲南迤東道王祿朋女字天津分司莊士寬次子

心咸未嫁心咸病卒女奔喪守貞未幾病卒

縣志

文童畢照聘室王氏年二十未嫁而照故女奔喪

矢志守貞以姪秉垣爲嗣未幾病卒

楊恆懿聘室章氏未婚而恆懿亡訃至女慘痛奔

喪衰經守貞卒年二十五

張玉如聘繼室馮氏未歸而張卒女奔喪守貞上

事孀姑下撫前室遺孤里黨賢之

俱同上

趙錫齡聘室龐氏太醫院龐景雲女年二十五錫

齡卒女聞訃請奔喪母緩之未幾姑復卒女痛不

已乃歸之守貞以終光緒元年旌

新通志

楊廣義妻趙氏夫患瘵疾入門卽異室居嘗割臂醫之愈未幾客於外疾復作歸而死矢志守節年二十二猶處女也

李某義女佚其姓初李宦閩買婢四及長嫁其三  
一美且賢李撫爲己女謀聘戚族女泣曰兒幼聞  
父母已將女字士族後值亂離被賊擄遂相失義  
不可以再婚李許之後年七十自知死期無疾而

逝

俱同上

劉玉清僕女姓氏未詳廣平人給配未婚其夫遠行不返女終身不改字劉族重之呼曰老姑守貞

至七十餘歲卒

縣志

張子合聘妻甯氏女粹姑住雙港沽距張家白塘口五里張病卒女聞哭往守張以吉禮迎入門喪服見舅姑盡婦禮未逾百日寢疾卒光緒四年事也卒後二年夫仲兄宗生子慶遂以爲嗣方張氏以吉迎女觀者闐溢有再醮婦二人私相語曰彼眞千古我與若不可謂人也其感人如此

采訪册  
以上

貞女

宋文元女鄰人傅良臣等盜劫入室被執逼姦不從與祖母劉氏同時被勒死康熙三十二年旌

前志

訓導張廷錡女名懷清幼字王埤未婚而埤卒女潛製素衣閉門投水甕死合葬於埤之墓乾隆十

三年旌

周人騏撰傳

劉大觀聘妻朱氏冲漢女年十八聞訃奔喪養姑舅攜夫弟賈於外比姑歿竭力營葬迨夫弟既婚女謂娣善事高堂吾事畢矣不食七日死道光二

十三年旌

縣志

周貴思聘室姜氏沈重寡言年十八未嫁而貴思

列女  
溺死氏矢志守貞越四月父母不告女更爲婚女知之遂夜縊其家薄棺以殮周族聞之迎柩加槨與貴思合葬焉

舉人王枚女枚以知縣分發山東許字於同省候補令張希哲子爲媳未嫁枚權蘭山縣篆張以交代口角刃枚落其指枚因傷而死女投繯自縊

舉人孫弑妹幼字於某未歸而某故女自縊

方有信女二姑性溫柔孝父母九歲許字王氏王貧不能婚女年二十九王病卒父母改字范氏女聞自縊死時同治七年

牛有德聘妻胡氏未嫁夫亡自刎死時年十七俱

上

甯貞女父德裕早故叔亦亡女事二孀母極孝年

二十四許字張合百日而合歿女聞訃請於孀母

歸張爲夫立嗣絕粒死請旌册以上烈女

曹某女名炯字重光生而茹素熟讀黃庭背誦如

流年及笄作遊仙詩投筆而逝詩云朝來洞裏飯

玉京憶得昨宵松下坐月明星朗聽吹笙九天何

事萬仙齊玉旨傳來賜錦衣憶得元都朝謁散雙

鳧仍作

彩雲飛著有非非集傳世

國朝閨秀正始集

殷某女名湘英字雲和工詩有詠孫貞媛詩爲時



所誦

詩云梅花嶺上葬嬋娟便比梅花亦宛然偏

羅浮夢冰骨何慚姑射仙零落春風

倍惆悵招魂須向月明天同上

許某女名雪棠穎慧工詩及笄不字所作詩文闕

不示人惟雪中海棠一律爲時所誦

詩云移從香

見凌寒意不降日映輕紅嬌帶淚風扶弱質笑迎  
窗朱門舊許宜春睡冷院新看伴玉缸卻恨杜公  
無好句空教十月渡寒江查心穀蓮坡詩話曲  
周別業庭前海棠忽於十月雪中盛開張若巖大  
尹爲賦七律一首和者雖多以此爲最汪西澗徵  
士津門雜咏有云書生不櫛不畫眉傳來豔絕海  
棠詩若教玉秤稱才子壓倒樓頭舊婉兒正指此  
也又魏敏果公寒松堂集載易州范女士許田氏子  
未娶田歿女服毒死有海棠變白異作詩弔之云  
力挽天河一氣通殉花血盡失殷紅可憐地下從  
夫女亦在蕭蕭易水中雖哀樂之不同皆見物理  
之感召合拊記之梅成棟曰才而不嫁與學而不

仕者何異雪棠非具過人之識烏能協不字之貞  
若雪棠者謂巾幗之子陵也可 國朝閩秀正始

集參津

門詩鈔

趙莖女西姑幼敏慧數歲讀詩書皆成誦好吟咏

有父風未聘卒於家

律門詩鈔  
以上才女

梅珽繼妻劉氏姑卧病八年侍湯藥無間寒暑並  
割臂醫之奪兒乳以哺未幾姑歿夫繼亡氏年二  
十五家益窘有餽輒卻之守節四十年乾隆四十

八年旌

縣志

高天秩妻陶氏幼讀書知大義天秩卒氏年二十  
一姑胡氏病瘡氏吮之祈以身代尋自生疽姑疾

果愈子靜以舉人官容城訓導孫棠恩教諭廣恩

編修卒年六十二歲咸豐二年旌

采訪冊

金慶蘭妻周氏幼有至性弟痘疾危眼矇周禱神

求代弟疾果愈而已一目竟眇長適金未幾夫亡

事孀姑孝姑歿遂不食死同治七年旌

縣志

張樹榮妻婁氏孝事舅姑舅疾割股醫之未幾夫

亡矢志奉姑守節卒年四十光緒六年旌

新通志

王鐸妻高氏侍姑王氏敬順無違乾隆三十二年

秋間姑忽染瘟症日夜侍奉湯藥而病勢益沈乃

暗割左臂肉寸餘和藥以進姑隨大汗而愈氏夫

服賈遠方夜夢其父母以病告醒而異之急束裝

歸始悉顛末皆以爲婦孝所感

采訪冊

張慕九妻周氏原籍浙江山陰縣生有至性通詩

書大義克盡婦道逾三載翁逝一家生計惟叔翁

質夫是依孝敬之如翁咸豐三年九月叔翁患病

甚危婦顧念家門恩義所關焚香祝天願以身代

暗割股肉寸許入藥同煎服之立痊家人未之知

也婦忍痛無異狀明年及夏始露癍痕方羣曉質

夫病愈之故爲之加敬

同上

湯橋妻穆氏夫亡守節養姑訓子艱苦備嘗姑歿

哭之喪明不數月亦卒

前志

張倫妻蘇氏年十九歸倫事舅姑盡職姑歿遺幼子並二女氏撫之不辭勞瘁女妹既長出己匱分畀之無所吝舅老病昏瞶中呼孝婦氏計無所出循階號禱於天割臂肉寸許和藥以進舅疾爲愈

孫勤張孝婦傳

貢生牛爽妻李氏早寡守節子鍾瑞妻張氏侍奉

湯藥手除糞穢久而不倦戚族咸稱賢孝

前志

孫克開妻陳氏年二十五舅歿姑孀卽與夫隔牀伴姑眠二十九年夫先姑歿禮葬二喪撫育二孫

成立鄉閭稱爲孝婦

同上

楊國正妻呼氏幼年割臂醫母疾爲之愈及笄適

楊孝姑姑病亦割臂醫之愈同時有任姓婦者夫

病危貧無以療亦割臂醫之愈

縣志

郭應第妻鄧氏幼孝於親及笄于歸恪盡婦職舅

病危割臂肉和藥疾遂愈

案後無事蹟類有郭應第妻郝氏疑卽是

李銀妻孫氏歲祲疫大作夫與姑俱病氏亦疾強

起侍湯藥刲左右股分進之姑與夫俱痊而氏亦

無恙

徐林升妻牛氏刲股療翁病愈

翟奭齡妻湯氏刲股療姑病愈

中書齊嘉紹妻王氏姑病刲股療姑而死

監生姚景崇妻李氏翁病篤氏刲股和藥閭里稱其孝

趙榮久妻李氏家貧夫無業氏以鍼術養翁姑數十年如一日

舉人曾醇妻白氏年二十五夫亡舅病危割臂醫之當事旌其門

胡士龍妻張氏年二十九夫亡杜翰妻孟氏年二十四夫亡各守節三十餘年均以孝著

梁承澤妻武氏年二十二守節三十一年兩次割  
臂愈舅姑疾

蔣氏浙江人父官湖南通安仁縣令于恩隆爲女  
時曾割臂愈母病後姑張氏病篤又割臂入藥姑  
病亦愈旋因割處受風而卒人始知之時年三十  
楊鍾澤妻劉氏翁友豹官守備暮年失明家甚貧  
氏孝養備至一夕火延於室時鍾澤外出氏奮身  
躍火中負翁出得不死而氏焦灼無完膚月餘始  
愈後翁及鍾澤歿無子無葬地勾於親黨購地半  
畝以葬焉



金佑妻王氏年二十九佑亡無子遺一女氏矢志守節姑中年失明先意承志相依爲命者十八年偶歸甯半日卽旋父母挽留曰姑瞽何忍頃刻離也迨姑歿女亦繼殤氏哀毀卒

吳天德妻子氏鹹水沽東新莊人年十七子歸貧苦自甘家有薄田氏晝同夫灌園夜勤鍼黹以資食用時祖姑在堂侍養必有酒肉夫亦如之而已則饜糟糠年二十七天德亡氏矢志靡他祖姑衰病氏坐卧偃抱每食返哺越十餘年祖姑歿年百歲矣氏竭力營葬鄉里無不敬服有外弟副將銜

姚懷德者憫其貧窮節孝屢欲迎養氏堅辭不就  
今五十餘歲

一品封典張錦文妾劉氏事張母先意承志敬謹  
備至二十餘年如一日親戚賢之道光二十六年  
三月十九日張母病卒劉哀慟絕粒七日死年四  
十六

孫桂林妻魏氏年十九而寡子紹曾在襁褓中氏  
絕食數日誓以死殉姑抱兒泣曰汝死孤不保且  
翁姑煢煢無依奈何氏忍痛強起奉養翁姑以孝  
聞翁姑相繼歿經營喪葬俱如禮子稍長從學外

塾氏督課嚴遂遊邑庠今五十歲

俱同上  
以上孝婦

王國士妻曹氏國士無行利豪棍馬榛多金逼妻與榛苟合羞憤痛哭潛將幼子勒死遂自投水死

榛與國士俱照律擬罪康熙四十九年旌

前志

張大妻張氏爲拒強奸被殺康熙五十七年旌

張庚錫妻陳氏惡少李大胆逼姦不從被殺雍正

三年旌

俱同上

舉人韓理繼妻張氏夫亡殉節嘉慶八年旌

縣志

庠生邵梁妻王氏梁卒一子旋夭自縊死年二十

九嘉慶八年旌

同上

張起妻趙氏嘉慶十一年十二月村人田科乘其

獨處夤夜踰牆入室調之昭以利趙怒詈科肆強

暴益大呼詈科遂斃之獄成旌之如例

梅成棟記趙烈婦事

節錄

東沽村民張起御車外出母爲人備妻趙

氏獨居一子甫襁褓嘉慶十一年十二月念九日

夜氏爲人勒斃鄰居告其姑往視見尸遍身戳傷

一剪刀在旁訊之同院張守亮云是夜外出不知

也覓其幼子或言在里無賴田科家姑往察問伊

媳死狀田瞋目叱之迄無端緒張起歸欲鳴之官

地保雲仰泉阻之田託人行賄並允代娶一室張

心動氏母舅許獨不可入城鳴冤宰往驗拘張守

亮並田科兄田會雲仰泉質訊雲已逸去許指名

田科宰難之許曰兒在科家又况雲寢訟非科而

誰科悍不承捕仰泉數月無迹田會赴都控冤英

公乘輅臨鞫因熟思問田會曰幼兒孰得之河岸

者曰子得祥早出溺見兒號抱歸公曰爾子年幾

何曰十餘公拘得祥食以菓餌曰此案汝父與叔

俱承矣爾蓋詳言之得祥曰此事胥我叔所爲因  
歷述見聞又嚴鞠守亮亦具服而科終不承會仰  
泉自關東捕獲質之所供同公毅然曰此案田科  
起意圖姦斃命張守亮貪賄加功雖該犯狡展而  
衆供僉同請速正典刑以慰烈魂遂將田科梟示  
守亮疑絞氏旌獎郡民稱快嗚呼氏之烈也聞勘  
驗時嚴冬單衣百結如鷄牀閒堆敗絮纍纍貧孱  
若此驟聞遺兇暴誘以利劫以威以爲無有不從  
者乃動以賄不污戕其軀不污殺其子不污  
保身完名卒以死殉抑何偉哉 津門詩鈔

高爾信妻魏氏年十七于歸比鄰宋某妻與有違

言搆於其姑適魏母遣從子自銑迎歸夫及姑皆

外出某妻嗾鄰衆誣以爲姦自銑被逼誣服遂自

戕以明志獄具官不能理雍正十二年六月事

志 桐城方苞撰高烈婦傳烈婦魏氏天津縣產  
灘人雍正十一年年十七歸縣民高爾信高儼屋

官廣東與宋某同宮庭宇相望某妻與烈婦有違  
言數搆之於其姑十二年六月烈婦將歸甯其母  
遣從子自銑迎適高嫗及爾信皆出某妻走告其  
姑曰汝婦與人通入戶即探囊金與之復嫉東西  
無籍者數人闖入交闕強解自銑衣脅立借券否  
則共證之烈婦呼銑曰亟鳴之官若書券我即死  
銑暗弱急求脫執筆欲書烈婦望見即引刀自刎  
眾嚇自銑且誘之卒書券烈婦死因以券爲徹有  
司莫辯也既當自銑大辟而後知其冤以矜疑繫  
獄乾隆元年赦免邑之學儒者朱紹夏孫坦爲文  
以標白之而致於余嗚呼烈婦遭怪變謂惟死可  
自明而卽用其死以成獄詞徒以銑之券耳人心  
之抗敵至此吁可畏哉傳其事以志烈婦之隱愍  
且使爲吏者鑑焉論曰古之聽訟獄者必悉其聰  
明致其忠愛以盡之疑獄汜與眾共之世有烏獸  
行而能殺身以自明者乎自古婦人之義皆以死  
彰魏氏則旣死而猶暗鬱易曰日中見沫又  
曰載鬼一車聖人繫辭以爲世戒有以也夫

金振妻丁氏振山陰人授徒於津遂家焉常匱乏

丁以女紅佐之振無內顧憂丁無出爲振納妾徐  
生二女振卒夜半卽柩前自經死時年三十八歲

貧不克殯郡人爲捐貲附葬於陳氏諸氏裘氏三

婦墓時稱爲津門四節烈云

前志 查禮節烈四  
婦歌并序天津舊有

三婦合葬一爲譚某妻陳氏一爲阮某妻諸氏均  
不受強暴汚以烈死一爲趙某妻裘氏以節死乾  
隆元年八月十八日金振妻丁氏無子視夫舍殮  
畢旋殉柩側里人請諸當事與三節烈並葬稱節  
烈四婦云按陳氏湖  
廣人蘇州譚應宸妻

袁進舉聘妻梁氏富國場竈戶進忠養女也初進

忠負薪河干有抱女自官船下者授進忠曰此女

生八月矣其父之官卒於舟母繼殞可善撫之進

忠遂哺以爲女進忠有長女已嫁夫家貧不能存  
活復歸母家性悍而險虐遇女父母弗能禁及女  
年十三見女貌端好陰與媒氏謀將鬻之女曰奈  
何賤置我耶疇買我當以尸畀之姊益銜之有袁  
進舉者亦業煮鹽落魄無偶且年將三十姊慫恿  
父母許婚進舉將娶又陰阻之越三年進舉外出  
不知其踪跡有傳其已死者姊遂謀絕於袁母持  
婚書來女閉戶遙語曰吾志已定欲不義處我今  
日惟死而已袁母知不可奪而返姊赫然怒捽女  
髮加箠掠之鄰之來救者皆罵絕尋進忠來不忍



視毆長女長女赴水投繯擾不已父母愈不敢爭  
女受楚毒無悔怨年二十八進忠脛生疽危甚女  
刲股以進竟痊家人皆不知是時姊虐之愈甚動  
絕飲食袁母感女之志且憐之遂迎歸焉逮進忠  
及姊相繼歿女極力營葬之復迎梁母同居兩母  
喪葬皆從女十指出姊有子流離復召而鞠之爲  
夫弟娶婦撫姪紹安爲嗣乾隆五十六年女以己  
志已遂竟自經死有司葬之天津西門外五烈墳  
側

津門  
詩鈔

人謂其地爲六烈墓乾隆四十五年建坊

縣志

李小二妹黑姑年十九適王姓爲室姑不貞與義子孫二姦欲並污之以塞其口黑姑懼不免是夜孫二果至黑姑驚覺呼詈姑來掩其口共按之黑

姑取刀自刎越數日卒官不爲理道光六年七月

二日事

梅成棟記烈婦李氏事道光丙戌七月二日棟自齋中歸見老嫗三五人聚談巷口

噴噴歎息翌日至館見庖人李小二伏地痛哭問之曰小人有妹名黑姑年十九去歲適王姓每歸甯淚痕被面不願行小人母訊之不肯言昨其家以妹病報母往視見妹奄奄一息未絕母泣守之至夜分忽微睜目見母徐曰孫二拴住否母堅叩之始曰孫二姑之義子充運署隸時來我家與姑飲逼兒供奔走兒心恥之以禮自防姑不怡輒尋鬻言毆必孫二來一言始解復微示意兒不之從姑銜恨刺骨絕兒衣食孫二猶乘閒來調譏兒嚴拒之恐不免潛蓄一刀防不虞六月二十四日姑

逐其子出是晚移被來就兒宿兒心恻不能寢四  
鼓姑潛起開門兒恍惚見一人閃入直逼兒處  
陡起拒之伊強力按抑兒滾叫姑來塞兒口兒遂  
取枕畔刀自抹血湧心迷不知人事久之微聞孫  
二與姑耳語曰伊已死幸無知者只說伊夫妻口  
角潑悍自戕此案可了此後不復知語畢血淚交  
湧闔目不語絕粒三日飲以水從喉間出後三日  
烈婦死小二叩縣求究官爲緝孫二至畧施以掌  
責示意指其下爲寢息焉

劉鍾繼妻王氏翁姑年俱八十餘侍奉維謹翁性  
褊急呼飯不至輒怒詈王先意承志無稍緩年二  
十三夫患癆症喘嗽不已咯血盈盂侍湯藥焦勞  
不寐者經旬道光丁亥正月八日病卒前數日生  
一女晝夜零泣侍旁劉自知不起慰之曰鬻我衣

物可得錢數百緡營運或免飢寒望善撫此女也  
對曰君死我豈獨生飢寒非慮可憐拋雙親耳然  
幸有兄嫂在夫聞言搏頰曰果如是劉鍾不死矣  
此言惟王母知之不能阻也及卒變服卽潛飲毒  
毒發輾轉靈牀前姑怒曰汝夫甫死汝便放刁耶  
王叩頭無言少頃腸斷而卒翁夢中恍見王來拜  
謝醒聞變哭之慟曰天乎奪我孝婦老朽誰依哉  
聞者悲之邑紳合鳴於縣爲請旌焉

梅成棟  
撰傳

武德騎尉王書勳妾左氏王病故哭之慟絕復蘇  
家人勸慰並防閑之王旣殮言笑自若咸謂其未

必死矣忽於三七之前三日仰藥殉節面如生時

道光二十七年五月事

縣志

處士葉正甲妻王氏年二十八夫亡越數日翁姑相繼歿後自縊死時咸豐四年七月二十六日

也

同上

張復妻趙氏復貧病無以爲生賴婦鍼帶餬口而復終不自安屢覓死趙俱解救之咸豐五年十月十三日復謂之曰我多方求死汝善防閑若不食而死其奈我何涕泣對曰我之辛苦不辭者惟期同老今既決不欲生同死可乎乃於昏夜偕行投

河後得屍猶相聯袂云

趙樹琪撰傳

張存義妻汪氏年二十九夫亡無子遺二女家有園田數畝傭一老成長工理之頗得力因種麥無資向夫姪借籽種姪家人諷之曰爾擇得人而嫁可也何必乃爾意蓋有所在也汪聞默不一言隨往夫墓前痛哭自陳至暮歸令二女飽食各睡夜將半忽聞其長女驚嘯少頃又聞汪哭四鼓後寂然次日巳刻門尙閉夫姪驚詫越牆窺探已自縊二女亦勒死乃大哭鄰人聞之趨往無不歔歔泣

下焉咸豐七年事

郝縉榮撰傳

刑部員外高學濱妾厲氏揚州人同治元年高以疫卒於京寓誓與俱死家人以殯未旋里勸阻頷之越二年高葬乃對家人曰妾大事畢矣妾亦從此逝矣遂仰藥死時年二十三

縣志

慶雲汛把總李銍妻陳氏同治二年六月十五日銍帶兵在山東臨清州勦賊陣亡氏聞遂不食死庠生王樹培妻張氏幼讀書明大義年十九于歸同治五年四月樹培病革氏誓以身殉樹培曰汝有娠數月儻生男一綫之脈尙可延勿輕死也及樹培故胎忽墮遂不食死

李夢齡妻梅氏舉人成棟女夢齡家貧氏勤女紅以資食用孝事舅姑夢齡失業不得志欲自裁氏勸止後購藥期必死氏知之乃先服其藥死同治

七年事

俱同上

劉寶宗妻張氏年二十四歸劉逾年夫故誓從死戚族勸阻之氏佯許諾乘閒投水甕死同治十一

年事

采訪冊

李永明妻周氏年二十二夫亡殮畢自盡距明死僅四日同治十三年事

同上

阮奇玉妻諸氏夫死無子營葬畢自縊以殉前

志



陶某妻陳氏于歸三載陶以疾卒氏引刀自殉天  
津道石天樞旌其閭曰鵲血流香

孫泓

閩秀正始  
集作孫洪

妻程氏名德輝幼聰慧讀書過目

不忘及笄歸泓婚之夕夢詩有梨花空自落之句  
意以爲不祥未幾泓病歿無子矢從死以繼嗣未  
立暫忍焉泓未卒常依父鑰居懷慶至是以舅老  
無依乃歸津奉養盡職越六載泓弟明生子曰紹

賢撫以爲嗣又逾歲氏夢泓來迎作遺書告其舅

其書畧曰兒生不辰壞牆賫恨藐若寡鵠上累椿  
庭始以白首無期黃泉可卜顧殤子不嗣恐若敖  
餒而昔人言就死易立孤難兒何人斯敢圖其易  
哉今幸螟蛉類我勿遺夫以伯道之憾菽水承歡

漫致親有史雲之憂羹湯洗手恩酬愛日分合常  
依獨是生者託奉色笑於形悼死者誰驅蠖蟻於  
黃壤舉案挽鹿之謂何而竟以幽明異視哉况黎  
花空落夢識初婚命薄自天分應早謝儻欲未亡  
人同穴俟白首而後不且貽夫子泉臺有懸望之  
繆耶興言及斯食息都廢所願慈幃鞏同山岳兒  
雖九泉埋骨遂闔戶自經時年三十有三其夕室  
三生含笑矣

中白氣竟丈觸窗而出一烏赤如火迴翔戶內良

久乃去生平作詩甚多卒前一夕盡焚之存者雨

霽幽蘭二章而已

雨霽詩云雨餘晴自好暮色霽  
林端斜景淡相媚小窗空復寒

花明如欲語鳩逐不成歡滿徑蒼苔滑含情獨倚  
欄幽蘭詩云初佩相參欲怨誰國香原不要人知  
祇應空谷佳人共翠袖天寒日暮時梅成棟詩注  
云人樂則願生苦則思死節完嗣立奉舅終身誰  
復捨身爲快哉乃從容就義視死如歸較一時激  
烈慷慨捐軀者不尤難與正誼明道古大賢事也

倚歎巾幗日月爭光矣

前

志參津門詩鈔秋坪新語

邢文貴妻殷氏父起鳳早故母爲媒妁所誑誤適

文貴年甫十六文貴母趙氏故娼也已逼長媳程

氏失節及殷歸復逼之誓死不從釜楚炮烙不爲

動復沃以沸湯不少屈閭里以其事鳴官爲察驗

殷諱姑惡詭以瘡對不數日死邑令張拘趙及文

貴置於法葬女西門外四烈墓側

縣志

邑人周焯弔殷貞女詩

一室薰猶品自分趨風狂犬謾信信清冰肯受蒼  
蠅點貞玉從教灼火焚冤可大伸終欲茹肌雖全  
腐亦常芬衛安門外添  
抔土從此人呼五烈墳

朱元善妻陳氏年二十八夫病晝夜療視不去牀

贊及歿哀號絕食四日死

王仲甫妻子氏進士凝祺女幼穎慧習經書嫻女儀年十六于歸逾載夫疾發氏百計醫療夜禱於天歷三月不懈又願減己算手疏以禱於城隍神卒不起哀號弗食舅姑知其志不可挽喻以爾夫無後應議繼嗣氏勉進勺水踰數月竟以哀毀死

陳文聖妻曹氏子歸甫四月文聖死氏哀號幾絕既歿氏以無孤可撫自縊以殉家人驚救獲蘇舅姑父母慰諭百端氏終不顧逾月餘防衛偶疏乘

閒赴水死知縣朱奎揚給額獎之並爲請旌

俱同上

朱烈婦某氏夫貧懦不事生理子甫三歲食貧居  
賤甘如薺焉有哈提督者營債射利稱貸者多被  
害烈婦夫有逋券計罄室不足酬追呼者急欲羅  
烈婦索償夫飲泣烈婦曰死矣不可辱門外不數  
武河流經其下烈婦運臂如圍牆置子於中奮身  
投河死踰時尸立水中伸臂指兒觀者兩泣

胡捷  
讀書

軒文  
集

庠生周鼎妻龍氏鼎疾氏割股和藥不瘳及卒氏  
自縊於柩前家人救蘇晝夜號泣淚盡繼以血月  
餘絕粒死學政金德瑛聞之給匾以旌子二自郤

邑庠生次自邠高州通判

縣志

繆日程妻金氏夫病氏封股和藥救之逾年日程  
亡氏嘔血死

呂衛得妻楊氏年二十衛得死氏投水死

金誥妻魏氏年十六誥故氏絕粒死

劉某妻趙氏于歸逾年而寡無子葬夫畢自縊死  
金讓妻章氏沔陽知州天垣女讀書能詩讓病割  
臂醫之終不起投繯幾絕家人救蘇旋嘔血死者

有遺稿

俱同上

金允恭妻章氏

縣志作  
龐氏誤

南皮人乾隆年間允恭病

療氏兩次割股醫之允恭卒闔戶自經姑破扉解

救得蘇一日聞雁聲仰天歎曰雁有歸時人無返

日賦詩黏壁絕粒六日死詩云此身孤寄似浮雲忍見泥金舊嫁裙春雁

又來人不返一天涼雨哭離羣未知鴻雁爲誰來

嘹唳聲中百種哀只恐有書將不去雙飛何日到

泉臺梅成棟金烈婦傳嗚呼人有奇節者恃有奇氣抱奇氣始完奇行是男子爲難况求之巾幗

中哉棟內兄金麗江日我家有奇人湮沒近五十

年矣惜無文字傳之余家十二叔名允恭年二十

聘章氏南皮縣人嫻禮則通文墨與叔情好甚篤

生一女名小玉未幾叔病療危篤章侍之辛勤備

至醫巫俱無驗一日流涕跪大士前割左臂肉雜

藥瀋以進叔飲之而愈叔生母陳察知之泣然告

叔曰兒活矣幸善調攝汝妻割肉啖汝矣叔聞之

泣歸室問章驗視不可強之解裏相示創痕紅潰

覽之驚怛病又作加劇章悲悼又割左臂以進卒

不起含殮之日哀哭踴躄絕移時抵暮託言浴

遺婢抱女出自縊於室族人來弔見寢戶闔怪之  
窺窗得狀驚呼有言弗救以成其志者姑不可以  
首觸扉夫兄破門解救甫蘇願問左右曰孰解我  
者衆以告曰夫兄迫母命義固當救耳自是晝夜  
防閑之迄葬盡禮以奉其姑居半載姑勸歸甯以  
實其哀歸南皮數日女病殤復返於金一日立中  
庭聞雁聲仰天歎曰雁有歸時人無返日我何生  
爲賦詩黏壁閒詠而視之血淚如雨遂不食六日  
死嗚呼視死如歸從容就義此古偉男子之所爲  
竟出於紅閨弱質耶聞某州刺史簿書錢穀佐之  
不讀父孝廉某官江南北州刺史簿書錢穀佐之  
綜理甚悉父歿扶柩歸次旅店中盜十餘人夜來  
劫氏居樓上叱盜曰汝等利吾財物耳勿犯吾母  
行囊盡以予汝舉數箱樓上擲下之盜聞然去臨  
時毅然得決捨之義與不顧破甑者同此何等器  
識耶得非人奇必其氣奇奇氣奇故其節奇耶古來  
之虧名辱節者類皆由奄奄無氣之  
所致其視章氏何如哉 津門詩鈔

林棠妻李氏年二十二夫亡哀毀絕粒誓以身殉



重刊三才月元  
姑勸慰之乘隙自縊死

縣志

陳恩紱妻張氏年二十餘夫亡無子遺二女相繼  
殤遂仰藥死

庠生王廷錡妻劉氏廷錡病亡遂自經救蘇夫弟  
壽眉以養姑繼子勸之對曰侍姑有叔守節無兒  
生則徒重親憂何若遂從一之初志乎言之慷慨  
遂絕粒死

張仲山妻趙氏年二十九夫亡氏絕粒死

舉人陳廷禧

榜名兆驥

妾萬氏性剛方知詩書明大義

陳病故氏吞金求死家人救蘇遂不食卒時年二

十四

孟福妻馮氏夫亡殉節

庠生張祉齋繼妻李氏夫亡服毒死

尹廷玉妻高氏夫亡仰藥死年二十二

孟傳緒妻龔氏年二十四于歸未幾夫故氏先一

日仰藥死

周寶善撰傳

喬麟昌妻許氏年二十七夫故家貧無嗣氏仰藥死

朱聯第妻高氏年二十一夫亡越三日氏仰藥死

處士宋永齡妻謝氏年二十二夫亡殮後氏投繯

以殉家人聞聲救蘇尋絕粒死

城北西沽李某妻周氏夫病癆侍奉備至見大漸

以兒託嫂自經死越三日某亦死

郝縉榮撰傳

從九品劉芝鏞妾王氏劉泛海赴奉天舟覆而死

氏聞仰藥死年二十五歲

徐某妻張氏城南何莊人某耽酒嗜賭氏勸之橫

遭詈辱某旋質氏於平康巷氏聞之乃闔戶仰藥

死

楊慎恭撰傳

王桐妻黃氏庠生亦谷女桐病篤氏爲治後事甚

備王鮮戚族乃立姊氏吳某子爲嗣比桐歿從容

仰藥死

監生趙誘妻馮氏誘故殯葬畢馮服毒以殉

東安教諭徐界清繼室趙氏界清故服鴆死

王某妻某氏夫故無子絕粒十日死

舉人毛凌臯妻朱氏夫病割臂療之不愈及歿誓從死夫弟秩臯以撫孤勸未幾子女殤痛幾絕比姑歿視含殮畢立嗣遂自經時年五十道光四年旌

韓允望妻董氏道光四年旌

于維琛妻劉氏結縵甫三月維琛外出越六年輿

疾歸氏憂慘無人色百計調治不效及卒氏絕粒

七日死道光五年旌

梅成棟撰傳

廣東運同楊紹庭妾吳氏楊歿既殮氏徧歷各屋笑語如常羣竊議之楊故巨族次日弔客滿堂氏室門尙閉呼之不應婢嫗輩脫扃入見氏以楊之常服蒙首繫帶爲環已自縊矣裝束嚴整面如生弔者無不欷歔稱歎時道光十三年癸巳六月也旌表如例

宋某妻吳氏夫亡氏自縊以殉道光十三年旌

王書田妻魯氏夫亡殉節道光二十二年旌

監生樊景恆妻王氏監生松棟女年十七于歸後  
景恆患疫亡氏號慟淚盡繼以血家人稔知其性  
烈防伺甚周後稍懈一日晨起忽見氏昏卧細詢  
始知潛吞金指環四枚夫弟景升亟以藥進氏揮  
之曰世之未亡人所以不卽死者以有事親及撫  
孤之責耳今叔已成立能盡子職吾又無子烏用  
生爲惟望叔早生子以嗣兄後吾瞑目地下矣再  
問更無他語親族環視贈藥解治氏張目曰惜我  
命何如成我名乎遂卒道光二十五年旌

從九品王兆霖妻金氏兆霖故寒士謀食於外遺

疾歸氏百計療治兩次割股和藥不效及亡遂服  
毒急救得蘇氏曰吾志已決勿誤我復絕粒死時  
年二十七兆霖兄候選訓導書徵詩盈帙越二年  
書物故其妾袁氏亦仰藥死一門兩烈鄉里哀之  
董孟蛟妻王氏年三十二夫亡吞金以殉道光二  
十九年旌

武文郁繼妻趙氏夫亡殮後氏仰藥以殉時年二  
十六咸豐九年旌

郭樹妻徐氏夫亡吞金以殉同治三年旌

吳士讓妻盧氏夫病亡殮後氏仰藥以殉時同治

六年九月十二也同治六年旌

江蘇徐州知府趙作賓妾杜氏山東濰縣人趙卒於任越三日氏仰藥以殉銅山縣令高丙謀詳請旌表附祀府署旁之蘇姑祠徐郡士人有詩紀其事

田某妻邊氏某逼令倚門氏不從橫加撻楚身無完膚嚴冬風雪中令氏立冰上百計挫辱如是者數年竟以傷死里黨不平鳴於官邑令謝子澄拘某執法懲之

俱同上

潘煜妻高氏崇義女年十九歸潘未幾夫亡氏乘



閒自縊死時年三十九

新通志

任某妻張氏姑遇之虐無故遣歸母恚甚取翳自

刺氏大慟隨自刎死

縣志

職員梅銓妻楊氏庠生漑之女孝事舅姑銓以親

喪哀毀卒氏視殮畢卽自盡以殉時年三十歲

新通志

志

柴文庚妻周氏年二十文庚病亡氏欲以身殉翁

姑晝夜防護旋送氏暫歸母家姑嫂咸勸慰之氏

但言旣字柴姓卽未嫁亦當從死况已嫁乎後由

母家歸數日仰藥死

縣志

任姓婦夫病危貧無以療割臂煎湯以進夫飲之  
尋瘥

大河莊孫某妻某氏夫死僅一女家貧甚或勸之  
嫁不可勸之傭又不可采藜藿啖之面腫而死俱同  
上

李鵬章妻陳氏名淑雲詩書舊族好以文藝自樂  
聞人世奇節事輒侃侃稱道既歸值家中落行輩  
析產分居益以勤儉自勵而事舅姑務得甘旨以  
娛堂上意已而鵬章病顛累年備求療治術無效  
光緒二十年四月鵬章歿一痛幾絕家人闕其有

殉夫志防範頗嚴先時鵬章生有一女無子主後乃擇夫兄第三子士梁請以為嗣遂不食四五日家人強之已下箸矣越一夕竟卒蓋夜半人靜咽

金自盡年甫三十歲

采訪冊

郭大治妻曹氏于歸數年值大治染沈疴經年不起每夜祝天願以身代一日大治咯血不止旋暈絕氏痛極自經以殉家人解救不及而大治竟霍然起聞者欽其烈

同上

郎中石元俊妻吳氏同知玉崑女歸石孝舅姑夫

亡絕粒以殉光緒四年旌

耶抄

高世熙妻唐氏年二十一歸高孝事翁光緒四年

夫染疫卒氏年二十一卽日仰藥以殉已旌

新通志

孟傳謀妻龐氏年二十四歸孟孝事孀姑能得歡  
心閱四載夫故無子哀痛欲身殉父母戚族交勸  
之乃略進杯水是夜投水甕中死夫亡僅十三日

同治十二年事光緒五年旌

采訪冊

靳汝吉妻楊氏年二十八歸靳夫瞽敬事之未幾  
夫亡舅無依忍死以守越兩月夫兄歸乃絕粒死

光緒六年旌

同上

權量妻宋氏年二十三量病故次日氏仰藥以殉

時同治八年六月四日也同治八年旌縣志

監生婁舉正妻王氏年二十四夫亡氏絕粒六日

死時同治九年九月十三日也同治十年旌同上

鹽大使張文靜妻梅氏年二十五歸文靜事姑盡

孝文靜病已篤籲天請代比歿視殮畢仰藥自盡

同治十三年旌耶抄

監生余作新妻趙氏作新在夏邑遇賊被害氏哀

毀不食數日卒時年四十有五光緒六年旌

趙中谷妻朱氏年二十八于歸逾四年夫亡絕粒

十六日死光緒六年旌俱同上

王恩紱繼妻金氏隨夫僦居河南恩紱以疾卒婦  
既欲引決旋以似續無人伯叔遠隔因鬻釵珥爲  
歸計越歲扶柩歸絕粒旬日而亡

楊光儀  
詩序

楊國昌貴州平遠人候選縣丞妻陳氏天津監生  
陳思源女同治十三年三月于歸光緒元年五月  
聞楊國昌遊幕陽穀感疾歸家寄居厯城雒口鎮  
調治無效目失明遂成沈疴氏禱天請代至十月  
十三日國昌死氏慟幾絕淚盡繼以血是夜躬親  
含殮畢卽乘閒吞金自盡生年二十一歲東撫丁

寶楨題旌

徵獻  
詩注

郭鴻儀妻張氏天津五品軍功張漣之女光緒七年鴻儀遭疾張氏躬侍湯藥履食俱廢並祈禱願代鴻儀病故張氏誓以死殉潛服鉛粉死氏時年二十五歲郭翁忠元河南候補守備豫撫李鶴年

題旌

同上

鄭起子婦劉氏母家田家背幼許字大沽鄭鄭子病廢知其年不永也致意婦家請絕婚父母皆允矣以語婦婦曰許嫁而死猶當守之況未死乎病廢命也烏得有他宜令其速娶女將侍其疾固勸之不可卒歸鄭鄭子病不能人而性乖戾屢撻婦

婦燂湯敷藥抑搔扶持十年如一日無怨無倦無  
悔又善承舅姑歡其舅亦嘗對人道婦賢無何鄭  
子死翁以貧故遣婦嫁遂潛仰藥死里人爲請旌

徵獻詩注引柴  
青藜烈婦傳

孫鶴年妻沈氏年二十四夫亡視殮畢不食死光

緒六年旌

邸抄

庠生陳杰妻宋氏年三十夫亡絕粒死光緒六年

旌

郭阜繼妻李氏年二十六夫亡絕粒死光緒六年

旌



朱棠妻劉一作

崔氏年十七于歸棠外出謀食劉勤

女紅孝養舅姑養葬盡禮未幾棠歸染疫卒劉仰

藥自盡時年三十五光緒六年旌

張清沛妻宋氏事舅姑孝年三十九夫亡仰藥以  
殉光緒六年旌

吳士奇妻郭氏年二十七夫亡投繯自盡光緒六

年旌

俱同上

程福緣妻史氏本農女生有至性端重不佻歸程  
時十七歲佐夫餉饁無賴子張見豔之每婦出以  
言調婦怒白於夫又歸白於父皆稔張兇悍不敢

較烈婦自是不輕出門夜值夫他往衣帶不解者數年後張偵其夫出乘垣夜入適風雨大作鄰不得聞而氏以全節死越日里人往視身受數刃殞於牀怒目不瞑光緒十六年五月二十日也時年二十有二旌表如例

采訪冊

趙介祺妻李氏年三十七夫亡仰藥以殉

請旌冊

李恩龍妻曹氏年四十三夫亡仰藥以殉

劉恩蔭妾王氏年二十五夫亡即日仰藥以殉

監生宋邦正妻張氏年三十二夫亡即日仰藥以

殉

庠生宋作賓妻褚氏年四十夫亡仰藥以殉

文童劉葆光妻王氏年二十三夫亡絕食死

章文瀾妾王氏年三十九夫亡二日仰藥以殉

李文祥妻王氏年五十一夫亡仰藥以殉

文童沈鴻疇繼妻楊氏年二十二夫亡仰藥以殉

廩生褚桂林妻劉氏年三十二夫亡仰藥以殉

增貢生辛榮妾王氏年三十夫亡仰藥以殉

王朋山妻陳氏年三十夫亡自縊以殉

王文善妻李氏年三十二夫亡殉節

沈銓妻劉氏年二十四夫亡葬後仰藥以殉

張元愷妻陳氏年二十六夫亡仰藥以殉

鄭寶謙妻劉氏年三十夫亡殉節

陸楨妻盧氏年二十九夫亡仰藥以殉

從九品張際亨妻王氏年二十五夫亡仰藥以殉

監生侯玉田繼妻李氏年三十夫亡仰藥以殉

金大鏞妻沈氏年三十寡越八載翁姑並遺子相

繼歿遂自縊以殉

裴秀卿妻鄭氏年二十一夫亡越十餘日絕粒以

殉

胡某妻杜氏年二十一夫亡仰藥以殉

溫某妻張氏年二十六夫亡越九日殉節

從九品楊恩熙妻呂氏年三十一夫亡二日服毒以殉

從九品徐榕妻辛氏年四十夫亡三日仰藥以殉  
楊葆廉妻張氏年三十夫亡事姑十七年至姑歿氏絕粒以殉

趙聯第妻陳氏夫病篤割臂二片和藥以進卒無效及夫亡仰藥以殉年二十一

張兆霖妻劉氏年四十一夫亡仰藥以殉

運同銜附貢生李運昌妻徐氏年三十五夫亡二

日絕粒以死

張德望妻章氏年十九夫亡二日絕粒以殉

郭翔祝妻賈氏年三十夫亡即日仰藥以殉

從九品孫煥妻呂氏年二十四夫亡四日絕粒以

殉

陳寶珠妻周氏年三十夫亡即日仰藥以殉俱同上

以上烈婦

庠生符鍾奇妻任氏年十七于歸踰歲夫亡孀姑

楊氏繼歿營葬盡禮守節二十年卒雍正十二年

旌舊通志、桐城方苞書符節婦任氏傳後凡盡乎天理而爲人倫之極者皆聖賢之事也蓋人

無微事無細而道之所全則甚大吾於天津苻鍾  
奇妻任氏事有感焉任年十七歸於苻踰歲而鍾  
奇死姑楊氏故孀也閱六月又死時任氏僅遺腹  
一女子而鍾奇弟妹四人皆孩提任氏保抱攜持  
爲之師又以其閒修業而息之凡二十年各授室  
有家而節婦死鍾奇可無憾於其親矣夫養之苦  
身以勤家多爲其子也自有任氏而承夫之義始  
備焉遭事之變而曲得其時義雖聖賢處此其道  
亦無以加焉者也凡士之安常履順而自檢其身  
與所以施於家者其事未若斯之艱難也而乃苟  
於自恕非所謂  
失其本心者歟

生員趙連璧妻王氏年二十九夫亡無子家貧姑

老堅貞自矢撫姪之符爲嗣紡績奉姑篝燈課子

苦節四十年之符成進士贈孺人乾隆二年旌

前志

主簿趙完璧妻石氏年二十五夫亡姑老子幼家

貧事姑鞠子備極艱辛子之篆之錄俱成庠生卒年六十六乾隆二年旌

趙都妻趙氏年二十四都歿以死自誓遺子之範甫五歲氏忍死鞠育辛勤課訓卒獲成立冰操四十年如一日乾隆二年旌

俱同上

庠生劉源泗妻李氏年二十四夫亡家貧甚勤女紅撫三子饗食不繼或勸令其子爲傭氏曰如是則不齒士類矣人欽其節乾隆四十八年旌

縣志

關容妻孟氏年二十八夫亡子幼舅客於外奉養祖姑夫弟品早亡其未婚妻吳氏來歸孟氏子尋



殤娣姒同心苦守撫嗣子經義並以節終孟以乾

隆五十五年吳以五十七年旌

周人騏孟吳合傳孟氏大沽人年二

十四歸闕維賢長子容越三載生子經野甫一歲容卒維賢產薄不足供饋粥乃棄家遊奉天當是時祖姑殷姑吳俱在堂夫弟品年弱冠得瘵疾其聘室吳尙未娶經野呱呱待哺仰事俯育人皆爲孟氏難之迨維賢歸老病益困夫弟品已歿經野七歲入鄉塾孟氏食糠糝衣鷄結而舅姑未嘗凍餒經野未嘗廢學蓋竭力女工結絨冠爲活計以事以育也一日值歲除薪米俱匱有戚屬饋米數斗草二束藉以度歲里黨代爲戚戚而孟氏恬然安之蓋是時年已三十九矣而貞女吳氏來歸吳氏鄧善沽人六歲隨母兄徙居大沽年十七許字維賢次子品越五年未嫁品卒女聞之屏色服不御有來議婚者女告於母矢志靡他母李及嫂傅懇勸不從母李病經年腰脅痛不能著牀榻女晝夜以手枕之無倦母卒同兩兄象乾宗乾視殮畢以首觸門扉幾絕兄嫂卽扶起詢其故女曰我之

當死豈始今日隱忍苟活以老母在耳今母已死  
可相從地下矣兄嫂晝夜防護譬解再三終不言  
最後兄曰妹但不死無不可順妹意者女曰閻氏  
二老尚在使我往事之則可不死矣其兄姑應曰  
是不難矣葬母後議之既葬兄終以歸開爲非計  
微露其意女尤其兄之誑己也則大慟不食兄無  
奈託戚屬向維賢道女意維賢以爲難引歸太僕  
之論却之女聞之日我不知書惟知此心之不容  
味耳又不食累日維賢知其志之終不可奪也乃  
擇日迎之歸孟聞吳女之來也且悲且喜乃遣子  
宿於他室而已與吳女同居偕力以待舅姑共課  
經野讀未幾經野病殤乃繼夫堂兄之子經義爲  
嗣二人共撫育之甲午丙申閒舅姑相繼卒喪葬  
胥如禮無何有同姓關某死其妻議再醮里中遂  
訛傳節婦貞女有改適意二人聞之對泣日人之  
多言不死之故也乘夜裂白布一幅爲二各執其  
一相對縊幸經義生母陳同院居覺而壞門入救  
之良久乃蘇二人大悲必欲同死其戚屬吳媪論  
之曰事之有無不能欺人汝二人本無他志若因  
訛言而死反若實有其意而聞言羞忿者盍俟久

而自明乎二人始釋然余又聞其伯姑劉氏年十九歸維賢兄維印生子哲而維印客死劉年二十三以鍼帶佐舅姑撫育幼叔訓子哲登武科孟氏其親感而興吳氏亦聞風而起者歟論曰關氏兩世三賢婦而孟吳更爲罕劉卒年七十一孟存年五十一吳亦年幾五十潛德幽光終當必發余恐他日傳聞異辭或歿其真故據所聞之確者書之

候選同知查世榮妻宋氏父惠綬長州人官雲南知府世榮卒氏年二十餘引簪自刺戚族救之乃進食遺腹生子有圻撫之成立官郎中嘉慶六年津大水有圻奉母命以捐賑得

旨褒獎封恭人

縣志

王國瑞妻張氏國瑞以忤匪徒某被殺氏年二十

六撫孤子璋奉姑守志縫紉自給璋年十三始知父死狀而某適遇赦歸璋懷刃伺之氏泣曰父仇當報然殺人者死爾父無後矣璋始泣謝卒年六十有七

按烈婦下又載王國瑞妻張氏道光五年旌表

承德郎盧起勛妾姜氏江蘇楓橋人性端淑知書識大義盧赴蘇省貿易遷延恆半載氏歸後長寓閭門母氏伴居焉道光二十年夏盧客歸旋病故氏時年二十三子恩溥三齡次年春盧訃至氏大慟誓以身殉繼念遺孤無托而盧繼室楊未有子計北歸母阻之氏曰旣不得事夫於生前矣豈可

無以慰之於身後南北相睽人其謂我何乃買舟而北抵津依嫡氏楊與盧寡嫂蕭以居和謹無間言惟遺產無多家計日窘氏摒擋井曰長茹素節操堅苦戚串咸敬禮之恩溥稍長就外傳束脩之費惟鍼帶是資督恩溥嚴日課俱覆之織繡時往往漏下乃已恩溥以咸豐辛酉拔貢官兵部同治

四年旌

俱同上

周人驥妾崔氏李氏人驥由雍正丁未進士歷官廣東巡撫卒於家崔李方盛年無出家人勸之嫁二氏誓死不從時人驥次子婦楊亦早寡遺二子

於是共撫之成立卒年皆七十餘

牛次原記二節婦事崔氏李氏

周蓮峰中丞側室也初中丞因公革職歸里旋奉罰修完縣城垣未及半中丞謝世崔李方盛年無子家人有勸其改適者二氏誓不從脫簪珥相與守節生平相親猶姊妹中丞次子婦楊氏亦年未三十而寡有子二於是合志撫孤本籍僅舊宅一區没入官家益貧米鹽不知所出崔李長齋繡佛戶庭寂若無人單衫布裙補綻幾徧饑不繼無感容人以爲有士君子風卒年皆七十

津門詩鈔

許敬祖妻宋氏年二十二夫亡守節三十五年乾

隆三年旌

前志

米希榮妻劉氏希榮貌陋而貧父母欲改字氏不

從時年甫十四卒歸於米巡撫夏玉旌其門

胡利溥妻劉氏年十九歸利溥未逾年利溥慕松

喬術遠遊不返劉力作養舅姑撫遺腹子忠楨成

立苦節五十五年

俱同上

楊文妻郭氏年二十夫亡撫孤孝事舅姑及歿庶

姑某氏逼之嫁不得已攜子之母家紡績自給比

庶姑歿乃厚葬之卒年七十有三

朱紹夏撰傳

王之臣繼妻田氏年二十三于歸撫前室女以恩

生子統越五年夫卒矢志撫孤族人利其產與夫

姊謀氏曲意下之皆感愧而止守節三十年卒

前志

桂聯芳妻曾氏聯芳歿含殮畢欲自經戚族以撫

孤大義責止之守節三十年子四皆成立一女適

張溥年二十九寡撫子成立亦以節著

縣志

吳涓妻孟氏年二十三夫亡守節三十年孝事舅  
姑訓子標入泮同時職員鄭其身妻王氏年三十  
夫亡事舅姑及繼姑皆盡職繼姑舉一子與舅同  
時歿氏竭力喪葬撫兩世孤備嘗艱苦年六十四  
以憂勞失明子經入泮

黃在中妻劉氏年二十九夫亡撫子銘守節卒之  
日命白衣就木以表其潔銘病其婦禱以身代越

七日婦卒而銘竟愈俱同上謂精誠所感



宋大成母某氏生子女三人夫亡孀守苦楚備嘗

子大成備身爲奴以孝聞

梅成棟孝子  
宋大成傳

監生王松棟妻朱氏性至孝穎悟通經史朱固庶  
出父歿嫡欲奪庶志朱泣諫乃止歸王撫前室子

女如已出松棟病刲臂醫之卒不起朱年二十三

撫孤妻親課之成舉人妻娶於余亦以賢孝著逾

年妻病瘵余割臂肉見骨和藥以進妻卒余年二

十一撫遺女依姑守節終身

縣志 案後無事蹟  
卷有王松棟妻朱氏

或卽  
一人

處士章恩綬妻林氏幼穎慧通文字識大義動必

循禮孝事翁姑恪守婦道恩綬病篤氏百計療治  
手疏於城隍神奪已算增夫壽卒不起氏時年二  
十八哀哭擗踊勢將垂絕家人以立嗣勸遂忍痛  
自守逾數歲姪文瀾生撫以爲子教養備至苦節

四十三年卒

縣志

張某妻劉氏年三十某亡氏一慟而止或怪之氏  
曰凡爲婦人者夫死當以守節撫孤爲己任徒哭  
何爲操作勤苦日夜不輟及子女長婚嫁皆氏經  
營苦節三十餘年卒

張澧妻王氏年二十一而寡無子澧弟妹三人皆

幼氏撫教倍至及長爲營婚嫁嘗以帛繡夫字日夜佩之長齋奉佛朝夕禮日月無月則拜星日吾以守吾敬也

庠生楊捷妻李氏歸二年而捷卒無子時氏年二十四欲以身殉家人羅守之氏絕食七日不死翁曰汝自苦如是意與亡兒有誓約乎對曰然翁曰是不必也古人云死節易守節難汝勿徒爲其易者氏乃食後夫兄生子肇又生子一崑氏以一崑爲嗣雖饜飧不繼而課讀不輟年六十六卒一崑乾隆戊申舉人

王某妻邵氏年三十夫亡二子皆幼夫弟欲奪其志氏遂攜子歸母家母貧甚無子氏日屢糟糠鍼帚所得皆固藏之曰吾將爲子娶婦續王氏後也其苦志如此俱同上

徐嘉賢妻劉氏桐城貢生劉敦元女年二十一子歸侍重闈能得歡心及子世昌生五世同堂鄉里傳爲盛事嘗值姑病篤刲臂療之夫患咯血又刺指瀝血和藥進夫輾轉牀褥凡二年餘日夜扶持維謹已而舅及夫相繼歿家中落姑叔子女皆在孩提門內艱巨一身任之教子擇良師友酬酢必

竭誠力無稍怠課之極嚴世昌與弟世光同爲光緒壬午舉人世昌復成丙戌進士入翰林世光繼官山東同知有聲於時長女適吳縣顏誠毅公子士棟割臂療姑姑歿夫婦同殉均已旌

宋訪册

陳以忠妻徐氏故世族博極羣書年十七歸陳二十四夫亡遺一子誓以身殉翁姑父母並以撫孤事重苦相勸勉始忍泣曰諾自是事翁姑迄終盡禮盡哀人皆謂能兼子職後爲子嵩年授室得孫震修而子婦又相繼病歿震修年甫九齡從師無力已則口講指授卽篝燈炊飯不輟討論嘗自謂

講論經義教養成人吾所樂爲若功令藝文故非  
所習比長始令從師爲諸生凡歷苦節五十餘年  
卒光緒二年旌表如例

同上

大沽王家齊妻張氏婚逾年而寡初思殉繼念俟  
遺腹果得男名復烜旣苦貧甚而母家故北塘鉅  
族遂攜子寄食且就傅惟歲暮必歸出十指所蓄  
以奉翁姑逮相繼歿喪葬畢始徙居使子從名師  
學有成應試俛得俛失氏轉諭解之弟文誥官江  
右欲錫偕往而難之氏慨然遣行七年始歸歸而  
設帳授徒遠近大至脩脯足供甘旨年八十八無

疾終咸豐壬戌有司以聞得旌如例有孫三人次

履賢光緒乙酉舉人

甯河高慶  
思撰傳

王家振妻楊氏子歸後屢空晏如越二年王卒貧

無以斂氏大慟嘔血族人資葬之夫從弟家雍尤

深敬異迎歸同居遂佐操作周勤殊常夕則闔戶

焚香又非佞佛尼踵門不納并不復歸甯惟族娣

張節婦偶相過從年八十一無疾而終

采訪冊  
以上節婦

魏健菴繼妻孫氏賢而有識度量過人夫弟鐵菴

才幹逾人而性放縱恆出外宿不歸兄怒之甚孫

輒婉言解勸且隱濟其窘焉鐵菴聘鄭氏女久不

娶忽乘閒竊婚書詣鄭退婚鄭素鄙其行諾焉鄭女誓不更字隨孀居叔母居以鍼帶自給健菴聞而恚然無如何孫曰勿憂叔非終不能自振者姑俟之鐵菴久而益困且染惡疾鄉黨悉擯不齒一日詣兄嫂所孫正色相規示自新路鐵菴痛哭誓改孫乃除一室與之約居內治疾不許一出不數月疾頓瘳任以事謹守無少過孫喜曰吾今可以見鄭姊矣當鐵菴退婚時值母病將革孫竊一婚書藏之蓋津俗婚書用二以雙爲吉也至是持其一詣鄭言叔自立復請婚鄭難之跪泣以請乃許



鄭女歸後事姒如姑鐵菴乃出就嵯館佐家計門

祚日興鄉里族黨傳爲盛事

采訪冊  
以上賢婦

金氏名至元字含英河間府學生金大中女適天

津查氏夙嫻內則不苟嘗笑性極孝事父母及舅

姑皆得其權幼讀書通大義穎慧絕人女紅之外

書算琴管無不精妙入神尤工於詩著有芸書閣

集二卷清拔孤秀不染粉黛習氣平素閱不示人

既歿世爭誦之濟南趙宮贊執信爲序以傳

陳鵬  
年撰

傳

詩婦某姓氏不傳年三十許攜女行乞於市舉止

嫻雅有大家風叩其里居不言飲泣而已久之題

詩城南門不知所之

詩云滴滴青衫溼淚痕不堪回首舊朱門相將曠有伶仃

女行過前村又後村

一時和者甚眾乾隆三十年事

秋坪新語

庠生欒樟妻王氏靜海副貢生麟女穎慧工詩文

幼聞兄讀卽往聽父問曰女讀書何爲對曰學作

好人耳所居近城一夕譙樓火瓦石飛迸家人皆

狂奔女倉卒不爲動及笄適欒欒常客遊於外氏

事姑育子以賢稱吟咏多不存惟南遊一卷行於

世

津門詩鈔欒立本撰行述母秉性寬和慈祥温厚無偏倚私曲之見自言平生無他學只是

朱子格言未敢一句忽過生平雖善詩恆不欲人知日婦道無成何敢操觚染翰與文人學士爭名

于歸之前居南城內城樓火人家牆壁俱飛舉家  
狂奔母倉卒出戶旋自止日蹂躪中吾豈可以與  
耶入室閉門負牆而止俄有石壞窗入著榻而陷  
母堅立不動火息亦竟無恙及于歸日吾父壯年  
嗜吟咏然於母之能詩未及知後於棄紙中得刺  
窗詩云蓬窗何用碧紗籠聊度金鍼一望通寄語  
小蟲休漫入此閒止許透清風固詰之始知爲母  
作吾父客柳州母憂思成絕句云寒夜淒淒夢不  
成關山險阻憶長征却憐兒女無愁思枕側惟聞  
斷睡聲又作長律書懷云恩恩百粵去鹿鹿遠驛  
馳途險勞相念家貧只自持但求平是福偏遇事  
多歧區畫親難倚經營子不知迷亡奴婢盡傾倒  
住居移爲病女工輟因貧兒課邇門庭真寂莫里  
巷任凌欺路遠魚書斷心懸噩夢奇三年曾有約  
一日豈忘思惟祝康甯返從容話別離父歸課不  
孝等讀書嚴時加鞭責母心傷之壁畫織履婦因  
題一絕父見之怒少解張廣文廷綺女名懷清幼  
字王室年將及笄忽聞婿歿女變色入廚自投於  
甕人言氣猶未絕母曰此不必救以成其志可也  
俄言已死母日得之矣爲詩以弔之從堂姑氏適

于常饗煊不繼母時餽聞一日姑來曰吾承嫂惠多矣然每賜必當吾匱是誰告之耶吾母泣然曰姑不見吾常使寬兒往戲乎暗捫竈冷故知耳姑聞而泣父如秦母課不孝等作勉學詩有曰孫子家貧猶映雪路公身牧尙編蒲困中勤勉皆通顯過隙光陰未可辜母病痢自知不起卽屏藥餌曰吾逾七旬三子無白丁一女爲太守婦濟濟五孫吾願足矣病篤時口占一絕而逝

都司王寶善室黃氏名靜臨字淑月能詩著有秋

聲閣吟草又李氏女玉蟾能詩過函谷關題壁云紫氣今何在青牛

蹟已殘空留五千時人稱之國朝閩秀正始集

舉人梅成棟妻金氏名沅字芷汀號問梅女史性

婉順通禮則奉尊嫜能得歡心未幾卒著有問梅

草一卷成棟繼室高亦能詩津門詩鈔孺人幼未學于歸後始學爲文

婉順得堂上歡葬姑後隨亡成棟悼亡詩有良友  
交情知己淚丈夫風格女兒身蓋道其實也孺人  
病篤時吟二絕句諄屬爲繪遺照代題之隔十  
年始煩李君桐圃爲摹問梅圖一時題詠甚夥

縣丞汪宏金女名瑞一幼知書工吟咏年二十適  
王又曾爲室又曾官獻縣主簿病篤汪割股療之  
及卒矢志以守事舅姑維謹訓子成立卒年七十

三著有冰雪集

縣志

劉鳳岐妻吳氏能詩年二十八生子數月而鳳岐  
亡時翁姑俱在堂姑病割臂療之年餘翁姑相繼  
歿家貧子幼惟夫弟舉人鳳喈是依操作勤苦其  
教子詩云妄貪一念禍根留富貴憑天不可求學

有才能身有寶心無利慾事無憂因貧不能請旌  
守節五十三年子壽源孫寶篆

陳三才妻宋氏工詩有遺稿

孟澤大妻邊氏工詩詞制藝有女弟子從學者其

子以家學遊庠

俱同上  
以上才婦

附流寓

毛孝女江甯人隨父寓天津十九歲母病割臂療

母病愈旬日又病又割以療乃大愈

縣志

會稽沈紹林聘室謝氏餘姚人寄居天津將婚而

紹林亡女聞訃欲以身殉母與姊防閑之姑歿翁

宦於廣東之高州女別母赴翁任所矢志守貞以終

長蘆鹽知事趙泌姪女江甯人許字同邑庠生紀祥楨爲室未婚而祥楨亡女聞訃大慟奔喪守志後遭粵匪之變舉室紛逃女子然一身遂偕母來津依泌以居操作勤苦誓死不二云

俱同上

蘇州譚應辰妻陳氏湖北人而娟秀靜好與凡女異應辰爲故江西巡撫安某僕娶焉安罷官卜居天津譚從之壬申夏譚卒陳哀甚以死自矢越三日視殮畢搜篋衍得夫所遺三百餘金上之主

婦僅留一錠付尼師誦蓮華經餘替珥之屬悉散  
同輩於是泣辭主婦主婦大駭異再四慰曰我孀  
居久汝其伴我我視汝如女汝其無死長跽對曰  
妾方少苟不死何以報良人得早就木妾之幸也  
衆知志不可奪遂告諸當事遣吏慰解陳默不應  
旣而慷慨自言王者以節義風勵天下亦良有司  
之責也顧諭妾以不死耶吏愕謝去主婦爲張棚  
道左備擡殮器具兼陳穀核酒醴如祖行狀而陳  
己不食三日矣至是始御匕箸言笑自若旣酒三  
行曰可死矣遂自經時觀者如堵已卜葬會者千



計咸嘖嘖稱烈婦不置云

沈起麟撰傳

江文龍妻梅氏南海人寄居天津氏素性好書史敬其夫如敬主人夫病篤氏禱天乞代以延嗣續卒莫救遂傾囊具夫棺既殮自縊以殉津之紳士義之並舉其翁姑柩合葬以慰其志

縣志

金臺妻張氏山陰人僑寓天津年二十七夫亡無子遺一女父母勸改適氏不可貧無立錫以泥脫銀釧售以爲食一日火燬屋遽削髮入尼寺尼不敢納乃復蓄髮苦節至七十八歲卒

同上

佟瑛妻趙氏揚州人幼聰慧六歲解吟咏父甚愛

之及并歸瑛瑛官縣令擢平樂守卒於官氏年二

十六扶櫬歸京師依兄公鉉僑寓天津遂家焉子

濬成進士氏著有殘夢樓詩草不輕示人惟祀竈

及題邊塞圖二絕爲時所誦

祀竈詩云再拜東廚司命神聊將清水餞

行尊年年破屋多塵土須恕夫亡子幼人邊塞

圖詩黃沙漠漠迥無垠萬里關河不度春今見壘

四腸欲斷可知 富日皮邊人 晚年以所居樓曰殘夢自號殘夢

主人其兄公鉉妾豔雪亦以詩名豔雪悼金夫人詩逝水韶光去

不留漫傷林下失風流美人自古如名將不許人閒見白頭國朝閩秀正始集參津門詩鈔

補遺

職員胡士鎮妻梅氏景州守備梅雲彪女幼通經

史得父母歡心嘗割臂以療母病嫁後斥裝爲夫  
家清積逋孝事翁姑撫五子成立次澄孝行有傳

又次溶舉人

楊光儀  
撰傳